

新集十之十二

六曹

事文類聚

新集十之十二

1加3
+68167
*30



13
167
30

新編古今事文類聚新集卷之十

東坡先生
蘇軾
蘇軾

南江

富大用

時可

編

金陵

唐富春

子和

刊

六曹部

總尚書

東京
學
校

歷代公華尚書古官也周為內史周禮司會中大夫二人戰國
時有尚冠尚衣之屬秦世少府遣吏四人在殿中主發書謂
之尚書漢初有尚冠尚衣尚食尚浴尚席尚書謂之六尚武
帝遊宴後庭始用宦者主中書以司馬遷為之遂罷其官以
為中書之職成帝建始四年罷中書宦者又置尚書五人一
人為僕射而四人分為四曹通掌圖書秘記章奏之事各有

利
269
34

其任一曰常侍曹主丞相御史公卿事二曰二千石曹主刺
 史郡國事三曰民曹主吏民上書事四曰主客曹主外國夷
 狄事後又置三公曹主斷獄是為五曹後漢光武以三公曹
 主歲盡考課諸州郡事改常侍曹為吏部曹主選舉祠祀事
 民曹主繕修工作監池園苑事客曹主護駕羌胡朝賀事二
 千石曹主辭訟事中都官曹主水火盜賊事合為六曹是時
 尚書雖有曹名不以為號靈帝以侍中梁鵠為選部尚書於
 此始見曹名魏改選部為吏部又有吏部左民客曹五兵度
 支凡五曹晉置吏部三公客曹駕部屯田度支為六曹而無
 五兵及渡江有吏部祠部五兵左民度支五尚書宋齊梁各
 有六尚書又有起部尚書起部不常興立官廟則權置事畢

省陳承梁置尚書五員後魏分尚書二十六曹曹置代人令
 史譯令史書令史各一人隋改為六部尚書分司曹務直宿
 禁省如漢之制唐因隋制六典建官龍翔二年改尚書為太
 常伯咸亨元年依舊宋初監藩鎮之弊以尚書郎曹出領外
 寄熙寧詔新官制以六曹尚書侍郎為長貳元祐置權尚書
 元因唐宋舊置六部各以尚書為之長

羣書要語帝曰龍朕聖讒說殄行震驚朕師命汝作納言夙夜
 出納朕命惟允尚書唯仲山甫王之喉舌詩士之權貴不過尚
 書漢官解詁尚上也言最在上總領之也釋名尚猶奉也百官

言事當有案平處奏之故曰尚書同上尚書萬事之本朕所責
 成也而廩秩儉薄甚非治體康帝起居注漢明帝詔尚書蓋古

之納言出納朕命機事不密則害成可不謹歟 漢官儀 天下樞

要在於尚書 韋彪傳 太宗謂戴胄曰尚書總國綱維失一事天

下有受其弊者 戴胄傳 漢置五曹今分六尚近喻喉舌遠譬斗

樞 隋江總表 出納王命敷奏萬機益政令之所由宣選舉之所

由定斯乃文昌天府 隋百官志 文昌政本司會要經况其五曹

斯納百揆 南史 八座之任非賢莫居 蔡謨疏 臣聞尚書百揆翊

亮萬機故天上尊北斗中樞陛下有南垣左轄 柳子厚遜官表

尚書職在機衡官禁嚴密 後郎顛傳 入作納言光輝紫極 韋誕

集 影組文昌升簪清覽 傳儀傳 獻善宣美 楊雄箴 綜事分務發

揮政源 魏志王肅云 尚書北斗尊 顏真卿集 持衡留藻鑑聽履上星辰 杜甫北

斗司喉舌東方領縉紳 赤管隨王命 尚書踐台斗 並同上

尚書總庶事官人承法憲 魏應據詩 解組便歸閑處士折花莫

笑病尚書 歐公 朝罷人人識鄭崇直聲如在履聲中 東坡 上方

行賜尚書易路人不識呼尚書但見凜凜雄千夫我如懷祖拙

自謀正作尚書已過優 並同上王述字懷祖與羲之齊名而羲

之輕之 尚書氣與秋天香 杜

古今事實

猶天喉舌

李固疏曰陛下有尚書猶天之北斗北斗為天喉舌尚書陛下

之喉舌 李固傳

擢任喉舌

後漢左雄虞詡上疏薦之曰雄有王臣蹇蹇之節宜擢任喉舌之官必有弼正之益由是拜尚書

試對第一

後漢翟酺時尚書有關詔將大夫以上試對政事第一天文道術以第一者補之由是酺對第一拜尚書焉本傳

早拜見重

蔡景歷拜度支尚書舊式拜官在日午後景歷拜日適逢駕幸玄武觀在位皆侍宴帝恐景歷不預持令早拜其見重如此

委以老成

晉山濤轉尚書表辭年老詔曰方今多事嘉謀良圖委以老成帝喜得人

梁明少遊知名之士位都官尚書簡文帝謂人曰我不喜明少遊作尚書喜朝廷得人南史

典定舊制

伏湛字惠公拜尚書典定舊制袁松漢書

閑練舊典

李固薦楊淮閑練舊典且有幹用宜在機密特拜尚書益都耆舊傳

明習舊章

王博拜尚書明敏習漢家舊事分紀

明習故事

侯霸光武時拜尚書時無典故朝廷又少近臣霸明習故事每春下寬大之書奉四時之令皆霸所建

典樞機

韋彪上疏曰欲急世所務當先除其患源在尚書典樞機天下事一決之不可私也 華嶠後漢書

典密機

尚書唐虞官也龍作納言詩云仲山甫王之喉舌秦改稱尚書漢亦尊此官典機密也 漢官儀

即古六卿

魏世事統臺閣重內輕外故八座尚書即古六卿之任也衛盧久居斯位不忝厥職 魏志

制法九品

陳羣為尚書制九品為官人之法 同上

謹言正直

朱穆為尚書謹言正直 謝承後漢

方毅廉貞

黃琬方毅廉貞為尚書 續漢書

魏朗蹇諤

魏朗字少英入為尚書再升紫薇蹇諤禁省不屈豪右 謝承後漢書

荀緄寬敏

荀緄字伯條拜尚書緄性明寬敏於衆職以厲群僚秉機平正直道而行是時内外公卿大夫莫不敬憚 同上

宜擇温厚

高馮正觀初上五事曰如尚書八座人之所責成者也宜擇温

厚修潔者任之尚朴素華浮偽使家識孝慈人知廉耻自然禮節興矣本傳

妙選德望

唐元宗欲用牛仙客為尚書張九齡諫曰不可尚書古之納言有唐以來多用舊相居之不然歷踐內外清貴之地妙選有德望者充之仙客本河湟一使典耳拔升清流齒班常伯此官邪也通鑑

舉觴見屬

後魏肅宗舉觴為群臣曰袁尚書朕之杜預故以杯屬元凱侍坐者莫不仰羨北史

上疏薦拜

後漢左雄虞詡上疏薦之曰雄有王臣蹇蹇之節宜擢任喉舌之官由是拜尚書

佩刀簪筆

尚書佩契刀囊執板加簪筆焉袁子正書又周捨問劉杳尚書官著紫荷相傳云挈囊竟何所出荅云張安世傳云囊簪筆事武帝數十年注云囊橐也近臣簪筆以待顧問南史

班詔賜珠

顯宗拜鍾離意為尚書時交趾太守張恢坐贓千金徵還伏法以資物簿入大司農詔班賜群臣意得珠璣悉以委地而不拜賜帝怪問其故對曰孔子忍渴於盜泉之水曾子回車於勝毋之門惡其名也此贓穢之寶誠不敢拜帝嗟歎曰清乎尚書之

言乃更以庫錢三十萬賜意轉為尚書僕射

後本傳

鄭崇履聲

前漢鄭崇字子游為尚書僕射數諫諍上納用之每見曳革履上笑曰我識鄭尚書履聲

本傳

杜預武庫

杜預為尚書損益萬機不可勝數朝野代焉號曰杜武庫言其無所不有

王隱晉書

叱梁冀帶劍

後漢張陵字彪仲為尚書省歲朝梁冀帶劍入省陵叱冀令出敕虎賁奪其劍百僚肅然冀弟不疑曾舉陵孝廉謂曰昔之舉君所以自罰也陵曰今申公憲以報私恩

本傳

呵虎賁置弓

朱穆拜尚書正月百官朝賀畢虎賁當陛下置弓於地曰此天子弓誰敢干越穆乃呵之曰天子弓當載之盾首之上乃敢置地大不敬即收虎賁付詔獄治罪莫不肅然

張璠漢記

古今文集

雜著

上李實尚書

韓愈

愈來京師於今十五年所見公卿大臣不可勝數皆能守官奉職無過失而已未見有赤心事上憂國如家如閣下者今年已來不用者百有餘日種不入土野無青草而盜賊不敢起穀價不敢貴百坊百二十司六軍二十四縣之人皆若閣下親臨其

家老姦宿賊銷縮摧沮覓亡鬼喪影滅跡絕非閣下條理鎮服
布宣天子威德其何能及此

謝襄陽李夷簡尚書撫問啓

柳宗元

某啓當州負外司馬李幼清傳示尚書委曲特賜記憶過蒙存
問捧讀喜懼浪然流涕慶幸之深出自望外伏惟尚書鸚立朝
端風行天下入統邦憲出司主憂控此上游式是南服凡海內
奔走之士思欲修容於轅門之外躡履於油幢之前譬之涉蓬
瀛登崑閬不可得而進也某負罪淪伏聲銷跡滅固世俗之所
棄親友之所遺敢希大賢曲見存念是以展轉歎歎書誅宵興
願爲厮役以報恩遇瞻仰霄漢邈焉無由網羅未解縱羽翼而
何施囊橐方堅雖虎豹其焉往不任一踊踴懇戀之至謹奉啓起

居輕黷威嚴倍增戰越

上河陽烏尚書欲獻文啓

柳宗元

伏以尚書以碩德偉才代著勳烈兩河定亂三城建功鼎彝竹
帛未足云紀進臨汝上控制東方隱然長城朝野倚賴宗元雖
屏棄遐壤而飽聞德聲所恨不獲親執鞭弭以備戎伍夙夜踴
躍不荒寧居伏以威稜所加狂狡已震莫大之績重復增崇小
子久以文字進身嘗好古人事業專當具筆扎拂繾綣贊揚大
功垂之不朽瞻望霄漢戀慕交深冒黷威嚴伏增戰越

律詩

多病執熱奉懷李尚書

杜甫

衰年正苦病侵凌首夏何須氣鬱蒸大水森茫炎海接奇峰碑

元火雲昇思霑道暘黃梅雨敢望官恩玉井冰不是尚書期不
顧山陰野雪興難乘

暮春陪李尚書過鄭監湖亭汎舟得過字 杜甫

海內文章伯湖邊意緒多玉樽移晚興桂楫帶酣歌春日繁魚
鳥江天足芰荷鄭莊賓客地衰白遠來過

送李遜尚書赴襄陽八韻 韓退之

帝憂南國切政命付忠良壤畫星搖動旗分獸歛揚五營兵轉
蕭千里地還方控帶荆門遠飄浮漢水長賜書寬屬郡戰馬隔
鄰疆縱獵雷霆迅覩碁玉石忙風流峴首客花艷大堤倡富貴
由身致誰教不自強

總侍郎

歷代沿革初秦置侍郎無負分隸三署主執戟侍宮殿出則充
車騎漢因之侍郎秩四百石以其爲郎內侍故曰侍郎侍郎
六卿之副凡諸郎掌更宜執戟宿衛諸殿門以侍衛之故通
謂之侍郎武帝時東方朔爲郎後楊雄爲侍郎當時謂之官
不過侍郎位不過執戟是也尚書亦有侍郎初入臺稱郎中
滿歲稱侍郎梁尚書郎入臺功高者轉爲侍郎隋煬帝二年
尚書六曹各置侍郎一人以貳尚書之職並正第四品今之
侍郎其置自此始又改諸司侍郎但曰郎吏部爲選部郎禮
部爲儀曹郎兵部爲兵曹郎刑部爲憲曹郎工部爲起曹郎
以異六侍郎之名唐武德六年廢六司侍郎貞觀二年復又
降爲正四品下惟吏部侍郎爲正四品上咸亨元年復爲侍

郎總章元年吏部兵部各增侍郎一員宋以為階官至元豐官制行始有職掌元祐二年初置權侍郎從四品如未歷給事中中書舍人及待制以上者竝帶權字祿賜比諫議大夫崇寧罷權侍郎建炎四年復置元仍之置六部侍郎

羣書要語位不過侍郎擢纔給事黃門楊雄解朝周歷五曹之

副建明萬事之本中臺政本思舉舊章六卿貳職今之盛選冊

府元龜序文昌貳卿位次八座東坡除陸佃制六卿之副百工

之牧唐制侍郎掌貳令之職朝廷大政參議焉臨軒冊命為使

則持冊書授之四夷來朝則授其表疏而奏之獻贄幣則受以

付有司唐百官志侍郎自皇朝以來為衣冠之華選自非履歷

清要望實具美者無以居之類要侍郎三十六人四百石一曹

有六人主作文書起草後百官志

詩句客曾與天通出入清禁中李白召登金華省我入銀臺門

同上登臨憶侍郎杜三賢惟侍從卓犖傾鄒枚韓侍從近臣有

虛位公今此去何時歸幸得履中氣忝從天上星紅旗照

海壓南荒徵入臺中作侍郎並同上響切晨趨佩煙濃近侍香

柳優游侍從臣左右天子顧六一集玉殿清霜綴曉班晚登

玉墀侍珠旒並同上與君持橐侍帷幄同到溫室觀堯奠東坡

紫府侍臣鳴玉佩山谷大似不蒙稽古力至今猶着侍臣冠上

古今事實

閑達故事

後漢楊球字方正為尚書侍郎閑達故事章奏處議為臺閣所

事類彙編

卷之十

德壽堂

崇信 本傳

彌綸舊章

謝承父嬰為尚書侍郎伏事丹墀彌綸舊章

謝承後漢書

尚德之舉

侍郎官重尚德之舉顛宜當之

韓愈舉韋顛自代狀

古今文集

雜著

薛左丞謝除門下侍郎表

汪藻

久參帷幄方俟黜幽進貳機衡遽叨圖舊莫寢已成之命唯深

非據之憂席寵過隆撫躬何幸 申謝 伏念臣粵從孤遠遭值聖

明少誦師言每信書而違俗晚陪國論更充位以妨賢蒙淵鑒

之誤知保孤衷而平進肆竭股肱之力何施毫髮之功豈伊白

首之衰蹤堪此黃扉之重任雖緣人乏實玷詔除茲蓋伏遇皇

帝陛下剛健粹精聰明覺聖疏通萬物之理灼見群臣之心猥

憐撲學之無他擢處周行之至要第崇資顯秩當收有用之材

方治世昌辰尤急可觀之效誓勤鞭策力振綱維與多士以同

寅上承休德殞百身而圖報敢愛餘生

律詩

寄鄭侍郎

王介甫

兩朝人物嘆賢豪凜凜清風晚見衰江漢但歸滄海濶丘陵難

學泰山高放懷詩酒機先息回首功名世自勞久願作公樽俎

客恨無三畝斲蓬蒿

事類彙編

卷之十

十一

德壽堂

送張侍郎

韓愈

司徒東鎮馳書謁丞相西來走馬迎兩府元臣今轉密一方通
冠不難平

寄王侍郎

杜甫

何限倚山木吟詩秋葉黃蟬聲集古寺鳥影度寒塘風物悲遊
子登臨憶侍郎老夫貪佛日隨意宿僧房

總郎中

歷代沿革初秦置郎中令其屬官有三署五官中郎將左中郎

右中郎將凡二署署中有郎中每員多至千人分隸三署主
執戟侍宮殿出則充車騎漢因之郎中之名猶因三署本號
置尚書郎四人分掌尚書事時馮唐為郎中置長光武分尚

書為六曹每一人尚書則領六郎凡三十六郎自漢以來尚

書諸曹郎侍郎或不兩置魏自黃初改秘書為中書置通

事郎掌詔卓而尚書郎有二十三人非復漢時職任晉宋齊

唯置郎中陳兩置後魏北齊唯置郎中隋以諱忠不置郎

中煬帝改曰郎唐改郎為郎中龍朔二年改為大夫咸亨光

宅神龍竝隨曹改復宋元豐官制行郎官理郡守以上資任

者為郎中郎中員外郎亦自為兩等頗自履歷而授之後來

相承必欲以關升知州資序為郎中於是拜員外者具改官

實歷歲月申吏部不以若干任但通理細滿入考則陞知州

乃作正郎別命詞給告常有旨初除郎官雖資歷已高且為

員外郎候吏部再申然後陞作郎中元六部各置郎中

羣書要語

舊選尚書郎極清望也

山濤啓事

鄧遐有才義論者

以為宰士之俊宜用為郎

同上

臺郎皆朝之俊選當足處事宜

辨正凝滯也

裴度奏

今以劣弱之質任督責之官以無用之才

管繁劇之任且臺郎清顯論望宜充者

郭璞表

草奏郎吏之選

必資時秀

元和制詰

宜序天臺之屬

同上

濫跡星署

職類

發揮

草臺

又參奏議頗練朝章宜從滿歲之遷俾轉分曹之次處

以彌綸之職當茲俊茂之選

宜正列星之次俾承賜筆之寵

省理辨疑時稱簡達

高選髦士以分劇曹

並同上

優遊省闥

珥筆萃軒

潘岳贈陸機

握蘭建禮總郎官

劉孝儀為江僕射薦

士表

翔于郎署

韓文

叨陪錦帳坐

漢百官志

往自星郎爰秉天憲

楊

國忠制

嘉乃令子為吾望郎

元徽之行韋審規父漸制

郎官古

之元士天下之務多所關決其於損益大矣

常衣制

虞詡曰臺

郎顯職乃筮仕之通階

職類

臺郎御史邦之俊茂若出宰牧守

頌聲興矣

晉起居注

晉尚書郎選極清美號為大臣之副

通典

詩句郎官清要為世稱

韓愈求貞行

馨香粉署妍為是先帝

白髮郎

東坡

鷄舌還應共賜香

君為尚書郎坐擁百吏繁

東川得望郎坐與西爭重

並同上

喜得廊廟舉嗟為臺閣分遠

從南斗外遙仰列星文

蘇味道

郎官有錦帳

杜

古今事實

含香握蘭

尚書郎伏奏事黃門郎對揖跪受故稱尚書郎懷香握蘭趨走

丹墀

應邵漢官儀

又尚書郎口含雞舌香以其奏事答對欲使

事類彙編

宋百官志

氣息芬芳也

尚書郎主作文書起草晝夜更直五日於建禮門外

漢官儀

作文起草

粉署郎署也以諸郎官握蘭含香故云馨香又謂之畫省以粉

畫之故言粉署又省中皆以胡粉塗壁畫古賢烈士以丹朱漆

地故謂之丹墀

通典

青縑白被

尚書郎入直官給青縑白綾被或以錦被給帷帳茵褥通中枕

太官供食物湯官供餅餌及五熟果實之屬五日一美食下天

子一等

漢官儀

夕對青瑣

黃門郎日夕入對青瑣門拜

同上

月賜筆墨

漢尚書郎月賜赤管太筆一雙隃麋墨一丸

通典

獨宿臺上

黃香為尚書郎常獨止宿臺上晝夜不離省闥帝聞而善之

類

常伏省下

馮豹為尚書郎每奏事未報常伏省下或自昏至明天子默使

人持被覆之

學虞三輔史錄

太微積星

後漢楊秉疏太微積星名為郎位入奉宿衛出宰百里

事類彙編

卷之十一

十四

德壽堂

太微後星

太微後二十五星郎位也史記

一曰依鳥

郎位十五星在帝位東北一曰依鳥郎府也三省郎中是其職也晉天文志

號三列宿

韋湊祖叔諧正觀中為康部郎中與弟吏部郎中叔謙兄主爵郎中季武同省時號三列宿

拜舉孝廉

胡廣舉孝廉為天下第一旬月拜尚書郎恪勤職事所掌兼治兩曹續漢書魏武集選舉令云國家舊法選尚書郎以取孝

廉也

詔選清白

安帝元初六年詔中郎將選孝廉郎寬博有謀清白行高者出補令丞尉後漢記

容儀端正

田鳳字季宗為尚書郎容儀端正入奏事靈帝目送之因題柱曰堂堂乎張京兆田郎三輔決錄

威容可視

杜軫為尚書郎威容可視華陽國志

皆須稱職

永昌五年勅六官分事四方取則尚書郎皆是妙選須稱司馬

馬唐會要

不可賞能

開成四年鹽鉄推官姚勗鞫問河陰黠吏得實除職方員外郎右承韋温上疏以郎官朝廷之清選不可以賞能吏續通典

豈郎才邪

李林甫源乾曜執政乾曜子潔為林甫求司門郎中乾曜素薄之曰郎官應得才望哥奴豈郎中才邪哥奴林甫小字也同上至郎足矣

孔若思勵學擢明經歷庫部郎中嘗曰仕宦至郎中足矣座右置水一石明自足意同上

自起撞郎

明帝性褊察常以事怒郎樂崧以杖撞之崧走入床下帝甚怒疾言曰郎出郎出崧曰天子穆穆諸侯皇皇未聞人君自起撞郎帝赦之鍾離意傳

皆主更直

五官中郎將一人主五官郎五官郎中無員凡郎官皆主更直執戟衛諸殿門後百官志

樸被逕出

魏舒為尚書郎時郎選或有非其人者論者欲沙汰之舒曰吾即其人也樸被逕出同僚素無清論咸有愧色談者莫不詠其高晉本傳

給帳入直

尚書郎入直官給帷帳氈褥侍史二人選端正妖麗執香爐護衣服奏事明光殿

宋百官志

職典樞機

徐防補尚書郎職典樞機周密畏謹奏事三世未嘗有過云

類要

才堪廊廟

索靖子綝字巨秀少有逸羣之量靖每曰廊廟之才非簡札之用州郡吏不足汙吾兒也舉秀才除郎中

晉書

白首郎署

馮唐以孝廉著為郎中署長白首屈於郎

荀悅漢紀

一家郎官

韋虛心父子兄弟更踐郎署時稱郎官家

舊唐書

披靚青天

樂廣為尚書郎與何晏鄧颺等談講衛瓘見而竒之曰常恐微言將絕今復聞之命諸子造焉謂曰人之水鑑也每見此人瑩然如披雲霧而靚青天也

王隱晉書

上應列宿

後漢館陶公主為子求郎不許明帝謂羣臣曰郎官上應列宿

出宰百里

本紀

馮勤佳吏

馮勤除為郎中每引進帝顧左右曰佳乎吏也

移本傳

趙萼高名

趙萼早擅高名在宦途五十年累經貶謫蹇躓備至入仕三十

年方霑省官

古今文集

古詩

天星送楊凝郎中賀正

韓昌黎

天星牢落雞喔咿僕夫起
食車載脂正當窮冬寒未已
借問君子行安之會朝元正無不至
受命上宰須及期侍從近臣有虛位
公今此去歸何時

律詩

和趙郎中捕蝗韻

蘇子瞻

麥穗人許長穀苗牛可沒
天公獨何意忍使蝗蟲發
驅攘著令與農事安可忽
我僕既胼胝我馬亦款矻
飛騰漸云少筋力亦

已竭苟無百篇詩何以醒睡兀
初如䟽眈澮漸若決漉渤往來

供十吏



平生輕妄庸孰視笑魏勃愛君有逸氣詩

壇專斬伐民病何時休吏職不可越慎無及
世事向空書咄咄

送陸郎中

錢起

事邊仍戀主舉酒復悲歌
粉署含香別轅門載筆過
鶯聲出漢苑柳色過漳河
相憶情難盡離居春草多

送致政朱郎中東歸

王介甫

平生不省問田園白首忘懷道更尊
已上印書辭北闕稍留冠
蓋餞東門馮唐老有為郎戀疎廣
終無任子恩今日榮歸人所羨
兩兒腰授擁高軒

喜李侍御拜郎官入省

錢起

粉署花驄入丹青紫誥垂直廬驚漏近賜被覺霜移漢主前
席穰侯許鳳池應怜後行鴈空羨上林枝

聞崔馬竝拜臺郎

蘇味道

振鷺齊飛日遷鶯遠聽聞明光共待漏清覽各披雲喜得廊廟
舉嗟為臺閣分遠從南斗外遙仰列星文

南省伴直

韋莊

文昌二十四仙曹盡倚紅簷種露桃一洞烟霞人迹少六行槐
柳馬聲高星分夜彩寒侵帳蘭惹春香綠映袍何事愛留詩客
宿滿庭風雨竹蕭騷

賀楊十二新拜省郎

白樂天

文昌新入有光輝紫界宮墻白粉闈曉日雞人傳漏箭春風侍

女護朝衣

省中郎事

岑參

華省謬為郎蹉跎鬢已蒼到來還襍被隨例且含香

嘲趙郎中

賀遂涉

負外由來美郎中望不優寧知粉署裏翻作土山頭

總負外部

歷代沿革 **晉** 尚書省置負外郎分判曹事 **隋** 開皇三年尚書

二十四司各置負外郎一人謂本負之外復置郎也掌其曹

之版籍侍郎闕則釐其曹事此今負外郎所由始也 通典注

歷代尚書郎各以部名為稱首或謂之侍郎皆無負外之號

前代文傳及職官要錄或有言負外郎者蓋謂負外郎散騎

侍郎耳非尚書之職也

煬帝三年每司減一郎置承務郎一

人同開皇負外之職唐尚書諸曹各置負外吏部置二人龍

朔咸亨光宅竝隨改復宋元豐官制六曹郎官理郡守以上

資任者郎中通判以下資序者為負外郎雖理知州資序未

曾實歷知州及監司開封府推判官者止除負外郎元六部

各置負外郎

羣書要語

任外郎之負承諸曹之務

胡文恭行王稹制

陝中臺

之局實副郎之聯

王鼎制

俾升文昌用副郎選

公是行雍明遠制

古今事實

散郎

外郎散郎也

漢惠帝純注

副郎

韋侯以考功副郎守盛山

韓文盛山十二詩序

彌重其選

負外郎唐朝彌重其選

通典

司皆其選

職負令二十四司皆其選也

古今文集

律詩

和王負外晴雪早朝

鄭谷

紫微晴雪帶恩光繞仗偏隨鴛鴦行長信月留寧避曉宜春花
浦不飛香獨看積素凝清禁已覺輕寒讓太陽題柱盛名兼絕

唱風流誰繼漢田郎

送鄭員外

韓翃

風流不減杜陵時五十為郎未是遲孺子亦知名下士樂人爭
唱卷中詩身齊吏部還多醉心顧尚書自有期要路眼看知已
在不應窮巷久低眉

同錢員外禁中夜直

白居易

宮漏三聲知夜半好風涼月滿松筠此時閑坐寂無語藥樹影
中唯兩人

聽水部吳員外新詩

白居易

朱紱仙郎白雪歌和人雖少愛人多明朝與向詩家道水部如
今不姓何

十卷終

新編古今事文類聚新集卷之十一

南江

富大用

時可

編

金陵

唐富春

子和

刊

六曹部

吏部尚書

歷代沿革 吏部尚書 周之天官卿也 漢成帝置列曹尚書四人

其一曰常侍曹光武改常侍曹為吏部曹主選舉靈帝改吏
部為選部 魏改選部為吏部主選部事右於諸曹尚書 晉吏
部尚書一人 宋世祖大明二年置二吏部尚書後還置一人

齊梁陳皆曰吏部尚書自漢及魏授此職者竝云吏部尚書
若授諸曹尚書直云尚書然此官歷代班序常尊不與諸曹

同也自魏至梁竝第三等梁定十八班班多為貴吏部尚書
班十四諸曹尚書班十三後齊尚書分統列曹隋吏部尚書
統吏部侍郎二人主爵侍郎一人司勳侍郎二人考功侍郎
一人唐因隋制吏部尚書一員正三品龍翔二年改為司列
太常伯光宅元年改為天官尚書神龍元年復舊天寶十一
載改為文部至德初復舊總判吏部司封司勳考功四曹事
宋張昭為尚書獨掌京官七品元豐官制行以審官東院歸
吏部尚書左選審官西院歸吏部尚書右選元因唐宋舊制
吏部掌天下文武官吏選授勳封考察廉能出給制誥等事
吏部令史分掌名頭以尚書為之長

羣書要語冢宰掌邦治統百官均四海書周官乃立天官冢宰

使帥其屬而掌邦治以佐王均邦國禮太宰之職掌建邦之大

典以佐王治邦國同上尚書萬事之本選部五曹之右常集吏

部尚書制輟乃鈞衡專茲銓鏡唐太詔令辨論官材澄汰流品

比諸內史選妙秩清舊制銓管九流品藻清濁李重集選曹箴

冠六卿統百職自集天官太宰秩序常尊自昔迄今冠諸卿首

同上藻鑿流品是資清識唐臨冊爾其懸衡處物虚心待士同

上文昌六卿楊億代表中臺職司願講求於故實未央朝會時

瞻近於清光同上合左右之聯歸簿領者凡六十案奏文武之

士在考覈者逾二萬負李清臣表天官冢宰之崇文昌選部之

重錢表類尚書總統百度是為古官吏部表率六曹茲為重任

自天官之任人物所宗以撥煩治劇之才行激濁揚清之政並

漢革民曹魏仍東掾毛孝先以清公見美盧子巖以真固

任職張纘表樂彥輔雍容自守當時恨其寡譽山巨源意存賞

拔不免與世沉浮同上東西兩漢左雄孤絕於前南北二晉山

濤莫嗣於後沈約代表自非伯豪之天下稱能仲子之時人歸

德孝先之拔奇抑偽巨源之黜惡舉善然後可以銓鏡流品平

均衡石梁王筠為第六叔讓史尚書表去歲冬初國學之老博

士爾今茲首夏將亞冢司雖千秋之一日九遷荀爽之十旬遠

至方之微臣未為速達任昉為范雲讓史尚書表況今日之

選專歸尚書以一人之鑒照察天下劉毅所云一吏部兩郎中

而欲究鏡人物何異以管闚天求其博哉崔亮答劉景安書儼

勢風雲非由羽翮徒得推遷就列俛俛當時曾無辟雍議禮之

名詎有銅雀獻賦之敏而政本寔繁司會攸切溫子升廣陽王

讓史部尚書表

詩可曾中無水鑑敢當吏部銓山谷丘山岌岌連天峻汚水澄

澄徹底清王丘崔沔當吏部時人為之語云分紀符彩照千里

銓衡總九流劉斌和許給事傷牛尚書持衡留藻鑑聽履上星

辰杜

古今詩賞

周之天官

吏部尚書周之天官卿也六典又掌文官選舉判天官司勲司

封考功等四司職貢令

漢之選部

事文類聚新集 卷之十一 三 德壽堂辛

吏曹尚書典選舉齊祀屬三公曹靈帝末梁鵠為選部後百官志注

士願居選

梁王泰山仲通能接人士人士願居其選官頃之為吏書衣冠傾屬梁書

時皆推美

李尚書又王尚書丘崔賓客沔掌吏部皆獲當時之美

二世吏部

謝舉字言揚掌吏部舉祖莊於宋代再典選至舉又三為此職前代未有梁書

五人尚書

謝莊子朏子淪淪子覽覽孫温六代五人皆為吏部尚書上同

先選德行

隋牛弘為吏部尚書其選舉先德行而後文才進用多稱職吏見隋書

好抑文雅

唐戴胄檢校吏部尚書然好抑文雅獎法吏時以寡學為訾本傳

一時精選

唐九齡人相用嚴挺之為尚書左丞知吏部選陸景融知兵部選皆為一時精選分紀

十年進拔

韋時康拜吏部尚書前後十餘年多所進拔朝廷稱為廉平嘗因休暇謂子弟曰吾聞功成身退古人常道今年將耳順志在

事文類聚新集 卷之十一
懸車汝輩云何子初嗣荅曰大人澡身浴德名遂官成盈滿之
誠先哲所重欲追蹤二疎伏奉尊命

當舉此人

吳隱之字處默有孝行母亡每哭韓康伯母輒泣涕語康伯曰
汝後若居銓衡之職當舉此輩人及康伯為吏部尚書因進用
之遂歷清要 晉中興書

始得此人

韋思謙舉進士累補應城令歲餘調選思謙在官坐公事微殿
舊制多未敘進吏部尚書高季輔曰自居選部今始得此一人
豈以小疵而棄大德遂擢授監察御史由是知名

法不如毛

毛玠為吏部尚書無敢好衣食者魏武歎曰孤之法不如毛
尚書今使吏部用心如玠風俗之易不難

代更舉阮

魏盧毓字子家為吏部尚書魏文帝使毓自選代曰得如卿者
乃可毓舉鄭冲帝曰文和吾自知之更舉吾所未聞乃舉阮武
孫邕帝於是用邕 並魏志

率人以儉

魏毛玠為東曹掾與崔琰並典選舉用皆清正之士雖於時有
盛名而行不由本者終莫得進務以儉率人由是天下之士莫
不以廉節自勵

執心平當

晉劉雄字公平遷吏部尚書執心平當

本傳

稱若神明

梁范雲性機警且善屬文為吏部尚書居選部寄任隆重書牘盈案賓客滿門應答如流無所壅滯官曹文墨發摘若神明拜人莫不服其明贍

職官分紀

止談風月

梁徐勉為吏部尚書居選官彝倫有敘嘗與門人夜集客有虞曇求詹事官勉正色答曰今夕止可談風月不宜及公事時人服其無私

本傳

清通簡要

鍾會見王戎裴指總角曰裴指清通王戎簡要後二十年此二

賢當為吏部尚書真是時天下無復滯才

劉義慶世說

周謹廉素

大康四年詔選曹銓管人才宜得忠恪寡欲抑華崇本者尚書朱整周謹廉素以道自居是其人也其以整為吏部尚書

晉起居注

不受一錢

晉鄧攸遷吏部尚書牧馬於家庭妻息食素不受一錢於人

本傳

不受餅金

褚彥回為吏部尚書有一人求官袖中將一餅金因求請間出金示之曰人無知者彥回曰自應得官無假此物若必見與不得不相啓此人大惧收金而去

本傳

饋餉不受

江湛為吏部尚書家甚貧不營私財饋餉盈門一無所受南史

遊處不雜

袁昂雅有人鑒遊處不雜為吏部尚書梁帝謂曰齊明帝用卿為黑頭尚書我用卿為白頭尚書本傳

一字拔之

蔡克居選官苟進之徒望風畏憚初克未仕時山簡常與王衍書曰蔡子尼今之正人衍以書示衆曰山子以一字拔人然未易可稱後衍聞克正選官曰山子之言驗於今矣晉書

三為此職

謝舉遷吏部舉祖莊於宋代再典選至舉又三為此職前代未有本傳又唐常慶凡三掌選銓授平允議者與之

佩玉乘輅

晉令吏部尚書五時朝服納言情進賢兩梁冠佩水蒼玉

佩囊簪筆

尚書佩契刀囊執板笏簪筆袁子正書

毛玠柴車

毛玠雅亮公正在官清恪其典選舉拔真實斥華偽于時四海翕然莫不勵行至乃長吏還者垢面羸衣常乘柴車軍吏入府朝服徒行吏潔於上俗移於下民到于今稱之行狀

褚炫紙帽

南齊褚炫為吏部尚書炫居身清正在選部門庭蕭索賓客罕至出入左右常捧一黃紙帽風吹紙剝殆盡南史

李肅題目

李肅字偉恭善論臧否得中甄奇錄異薦述後進題目品藻曲有條貫以此人服之擢為選部尚書舉選號為得才同上

山公啓事

晉山濤為吏部尚書前後選舉周徧內外而並得其才除尚書僕射領吏部濤再居選職十有餘年每一官缺輒啓擬數人濤所奏甄拔人物各為題目時稱山公啓事山濤傳

備儀注禮

牛弘拜吏部尚書時高祖召諸儒論新禮殺輕重弘所立議眾推服之仁壽二年獻皇后崩王公已下不能定其儀注楊素謂弘曰公舊學時賢所仰今日之事決在於公弘乃不拜讓斯須

之間儀注悉傳素嘆曰衣冠禮樂盡在此矣非吾所及也隋書

作考課法

盧毓為吏部尚書文帝使毓自選代曰得如卿者乃可前此諸葛誕鄭颺等馳名譽有四窻八達之謂帝疾之詔選舉莫取有名者如畫地作餅不可啖也盧毓曰名不可以得異人而可以得常士王者正以循名按常為職但當有以驗其後今考績之法廢而以毀譽相進退故真偽混淆虛實相蒙帝納其言詔作考課法

被召即拜

晉少帝即位以蔡廓為吏部尚書不拜乃以王德惠代之惠被召即拜未嘗接見客有與書求官輒置書閣上及去職其封如

初時談者以廓之不拜惠之即拜事雖異而意同

南史

加祿先呵

王弘自領選將加榮祿於人者每先呵責然後施行若美相賜接者必無所請人問其故荅曰王爵既加於人又相撫勞便成與主分功若求者絕官敘之分既無以為惠又不微借顏色即大成怨府問者悅服

與官嗔笑

謝莊代顏峻為吏書峻容貌嚴毅常有不可犯之色莊風姿溫美有喧語常歡笑荅之時人語曰顏吏部嗔而與人官謝吏部笑而不與人官

隨時浮沉

王戎領吏部尚書自戎居選未嘗進一寒素退一虛名理一寃枉殺一疽嫉隨時浮沉門調戶選

不許江總

陳孔煥為吏部尚書太子叔寶欲以江總為太子詹事煥曰江總有陳陸之才而無園綺之實太子深以為恨自乃言於陳主將許之煥乃啓願選敦重之才以居輔道

陳紀

獨識漫漢

東魏以楊愔典選嘗六十人為一甲愔令其自叙訖不省文簿便次第呼之無有誤者後有選人魯漫漢自言猥賤獨不見識愔曰卿前在元子思坊騎禿尾草驢經見我不下以方趨障面我何以不識卿漫漢驚服

三國典畧

下筆招怨

郭祚為吏部揚身潔清重惜官位至於銓授假令得人必徘徊久之然後下筆即云此人便已貴矣當時每招怨言

搥扇厲聲

元順為吏部尚書時朱暉素事高陽王雍欲以為廷尉評頗煩託順順不為用雍撫几曰身天子之子天子之弟天子之叔天子之相元順何人以身成命順搥白羽扇徐謂雍曰高祖遷宅中土朔定九流官方清濁軌儀萬古而朱暉小人身為省吏何合為廷尉清官雍曰身為丞相錄尚書如何不得用一人為官順厲聲曰殿下必如是順當依事奏聞

不署紙尾

宋廢帝時蔡廓為吏書徐羨之謂傅亮曰黃門已下悉委蔡自此已上固宜共參同異廓聞之曰我不能為徐羨之署紙尾也遂辭不拜

建康實錄

隨而下筆

唐裴光庭為相兼吏部尚書與中書令蕭嵩爭權不協及為吏部奏用循資格并促選限光庭卒嵩又奏請一切罷之光庭所引進者出為外職時有門下主事閻麟之為光庭腹心專知吏部遇官每麟之裁定光庭隨而下筆時人語曰麟之口光庭手

秉筆當除

韋巨源以吏書同中書門下三品時要官缺執政以次用其親巨源秉筆當除十人皆諸宰相近屬楊再思曰吾等誠負天下

巨源曰時當爾耳

唐書

舉扇一揮

蕭子顯為吏書習才氣見凡流賓客不與交言但舉扇一揮而衣冠切恨之

齊書

謝眺慙色

初謝眺告王敬則敬則女為眺妻常懷刀以投眺眺不敢相見及當拜吏部謙挹尤甚尚書郎范績嘲之曰卿才人無慙小已但恨不可刑于寡妻眺遂有慙色

宋書

脩義失色

元脩義選吏部尚書在銓衡唯事貨賄授官小大皆有定價時高居者先敘上黨郡闕遂求之脩義私已許人抑居不與居夫

言不遜對眾呼天喝賊人問居曰白日公庭安得有賊居指脩義曰此坐上者違天子明詔物多者得官京師白劫此非大賊乎脩義失色

官有定價

元暉遷尚書納貨賄授官皆有定價大郡二千疋中郡一千小郡五百

北史

士不問賢

崔亮後魏時為吏部尚書為停年格不問士之賢愚專以停解日月為斷

同

人中作市井

袁真為監軍范立平為吏部尚書坐語袁曰卿此選還不失護

軍哀曰立平卿何事人中作市井

後主借鼓吹

梁蔡徵拜吏部尚書啓後主借鼓吹答曰軍樂有功乃授蔡徵不自量揆奈我朝章然其父景歷既有締構之功宜且如啓

帝問何先

宋葉顥權吏部尚書乾道九年召對便殿賜坐賜茶禮異他日帝曰吏部條例朕亦置一通在禁中又問卿當官以何為先對曰以公忠為先帝曰卿宜無忘此二字後五日除簽書越二日

兼參政

楊誠齋集

上嘆有序

宋晏敦復為吏部尚書上嘗嘆曰敦復凝重剛方當公介然行

總有序槌發清明事無奸滯山濤毛玠無以過之

周平園集

諫屏鞠戲

陳俊卿謚正獻召為吏書時上未能屏鞠戲公上疏力諫入對上迎謂曰前日之奏備見忠謹朕決意用卿矣十二月拜同知兼參政

因論耗費

吏部尚書張壽因對論甲庫萃工巧以蕩上心酷良醢以奪官課教坊樂工負數日增俸給賜賚耗費不貲皆可罷上曰卿可謂責難于君明日罷甲庫諸局以酒庫歸有司減樂工數百人

中興系年錄

古今文集

事文類聚新集

卷之十一

十一

德壽堂

雜著

吏部尚書廳壁記

孫遜

吏部尚書在周為太宰之職其建設徒屬敷陳事典則周官備之矣秦滅古法始置尚書漢增其制創立選部故靈帝以梁鵠為選部尚書是以魏改選部尚書為吏部尚書自晉宋至於北齊皆因之宇文朝依周官置大冢宰卿一人蓋其任也隋革周制復曰吏部尚書皇朝龍朔二年改為司列太常伯咸亨元年復為吏部光宅元年改為天官尚書神龍元年又為吏部尚書綜九流之要為六官之長位尊任重實在于茲自武德以來多以宰相兼領一彼一此更為出入才難不其然乎皇帝在位之二十二年缺其官選于眾乃命武都公自兵部尚書拜焉公地惟宗英才則人傑忠孝自律矜嚴成憲式是軌度諒于衡石國之利也所及遠哉天鑒有唐俾多吉士踐其位者四十八人嘉名已著於國史故事宜存於臺閣繫以日月自得春秋之義記其代遷更是公卿之表以備官學列為壁記焉

為李景讓天官尚書表

李嶠

寵命載臨震悸交集鞠躬自覲屏營無措中謝臣聞俊又在官百揆所以時敘名器安假九流于是咸曠事關隆替義難忝越臣才疎行缺學淺智空十舍無千里之資一經乏三冬之教徒以遭逢昌運玷膺籍符幸雨露之曲成遇山川之廣納遂得差肩冕笏比跡流品出入臺省周旋階闥鏘金鳴玉坐榮枯朽擊水搏風顧慙腹背自忝司衡鏡亟易星灰雖智力已窮而清通

未效朱紫多紊涇渭莫辨宜其抵罪觸網稍清官謗翻乃假寵
增服更垂天獎是用荷恩內訟以榮為憂且夫八座位隆五曹
望重典南宮之喉舌象北斗之樞機式資藻鑒奚綜賓實自非
孝先亮直彥輔公忠山濤之簡靜篤素顧譚之心精體密何以
對揚天哲壓塞人望顧斯政本實總國彝豈臣庸愚所堪尸忝
伏願迴光寢照返汗收恩察臣由衷之請矜臣陳力之議則朝
端允穆天下至公四始輟在梁之譏六爻無負乘之累夫無任
顛懼之至

辭免除權吏部尚書狀

樓 鑰

寵光下逮惕懼靡遑竊以選部攸司是曰六官之長文昌攝事
亦叨八座之稱縱難求傑異之才猶當取踐別之舊臣一登仕
路三入脩門年除歲遷寢踰於始望寢驚夢愕屢蹈於危機惟
茲瑣闥幾更月琯遇事輒發徒自積於怨仇忤旨為多方日虞
於呵譴敢期辱獎亟賜褒遷徑由夕拜之聯擢試天官之職兼
汗青於東觀乃視草於北門揣愚分以何堪恐公言之不貸伏
望皇帝陛下收還成渙改畀真賢俾退服於舊班庶漸伸於歸
望

謝除權吏部尚書表

樓 鑰

充貞瑄闡自顧周功攝長銓曹忽蒙謨寵仰皇慈之至渥揣微
分以何堪中謝竊以選部持衡夙號六卿之長文昌聽履實為
八座之聯非素推公方不足以扼吏奸非妙有德望不足以厭
輿論雖黃紱之下無參異同而搢紳之流鮮不關係宜求精敏

之彥以當要劇之司伏念臣才不逮人學徒泥古一爲支郡三人脩門久侍上皇愧愚衷之無補親逢嗣聖荷褒擢之有加代言非陸贄之工批敕謝李藩之器俯狗芻蕘之論屢覓斧鉞之誅去省眼者五年遂躡登於冢宰離班心者一載遽首列於從臣禁林兼內制之文史館涉信書之筆滿盈已甚控避真回頌御府之襲衣益之鞶帶駕天閑之良馬覆以雕鞍但喜悅親之私敢云稽古之效茲益伏遇皇帝陛下多能天縱盛德日新蒐舉異才踵登持橐之選優容棄物獨負改竽之慙宜黜而遷以榮爲懼臣敢不深思僥冒勉竭疲庸爲山公啓事之書知非所及守崔亮停年之格何足言勞尚幾典選之平少助官人之道

與趙尚書書

朱元晦

茲者竊聞榮被追詔入長天官夫以尚書望實之隆宜在廟堂參斷國論之日久矣去歲入朝登用在卽而抗論極言不以利害之私少有回屈士論益以歸重而深恨其不少留也乃今幸甚天啓聖心召還故官是蓋將授以政無可疑者有識傳聞交相慶賀蓋不獨爲門下之私喜也然今日之事蓋有其難於爲力者不審明公何以處之竊計雅懷於其大者素有定論不徒愚者之言矣惟其小者之一二區區鄙懷竊有所疑於平日輒忘僭易而一言之惟高明之垂聽焉蓋天下之事決非一人之聰明才力所能獨運是以古之君子雖其德業智謀足以有爲而未嘗不博求人才以自裨益方其未用而收賓門墻勸獎成就已不勝其衆是以至於當用之日推挽成就布之列位而無

事之不成也今日明公之立朝不為不久而未聞天下有卓然
可用之才出於門牆之下自頃出臨藩服而熹始得觀於進退
官屬之際則見明公之所與者率多碌碌凡庸雖旰食宵衣以希
寸進之流未有以職修事舉眾所稱以為當舉而得之者也而
况於其學行蘊蓄真有以大過於人者乎今者進位於輔相之
列則所資於天下之才者益眾而所進退於天下之才者益重
若但以前日進退官屬之尺度取之則熹恐天下之士所以望
於明公者有未厭也時事如此之艱明公之任如此之重而所
以求助者如此之狹熹雖至愚猶竊為明公慮之而辱知有素
不敢不及此而一言也伏惟寬宥恕其狂易試加察焉蓋不惟
明公所自舉而凡所為屬之同列以妨賢者之路若宜皆在詘
指之中則熹之虛實可觀矣來使回自二山熹前此已屢拜啓
薄冗姑此少申賀禮而亦不敢為無益之空言也未由趨拜履
舄伏乞以時為國自重

吏部侍郎

歷代沿革吏部侍郎周之小宰中大夫也漢以來尚書侍郎今
郎中之任也齊陸瑒兄弟為相代兵吏部郎今侍郎也隋煬
帝三年尚書六曹各置侍郎一人以貳尚書之職並正四品
以下銓補多歸之唐武德初因隋舊置吏部尚書掌六品七
品選侍郎銓掌八品九品選龍朔二年改為司列少常伯咸
亨初改為吏部侍郎光宅初改為天官侍郎神龍初復為吏
部侍郎天寶十一載改為文部侍郎至德二載復為吏部侍

郎本一員總章二年加一員以裴行儉為之本員為中銓新
加員為東銓通典云唐列三銓尚書掌其一侍郎分其二尚書所掌謂之尚書銓侍郎所掌其一為中銓其一為東銓

元豐官制行以流內銓歸吏部侍郎左選

元豐初御史書

言天下選人名在吏部者且萬人索其家牒以式住籍時將

改官制先詔流內銓稱尚書吏部官制行歸吏部侍郎左洪

以三班院歸吏部侍郎右選

三班院舊例置局禁中嘉祐間

出之熙寧三年罷主部元豐初又詔與審官東院流內銓各

省注簿一官制行歸吏部侍郎右選

侍郎從三品掌文臣未

改秩者凡始命或有殿負皆試而後選若應遷格則團甲同
郎官引見於便殿稟奏改官右選掌武臣未陞朝者凡所任

而試不中等及已入官而未應選者皆勿注正關若選路分

都監將官閣門祗候都總管司承受皆以名上樞密院視朝

入閣則執文武班簿對立官制尚書侍郎通治曹事奏事則

同班惟吏選分領四選有所論奏則各以選事同所隸郎官

上殿

續命日要

初置二員蘇頌左選李承之右選元仍唐宋制

置吏部侍郎

羣書要語

小宰之職掌邦之六典八法八則之貳

周禮

司小宰

之職任佐平邦典選重朝倫忝我密啓屬於清鑒當勵濯纓之

操不遺刈楚之材

晏公類要

尚書六職天官首之辨論官材澄

汰流品比諸內史選妙秩清爾其以裴王崔毛為心

白集柳公

綽制

用解樞機之務俾居行鏡之職

唐太詔令

掌銓行之品藻

宜敘九流

楊億代表

更部典掌選舉至於所屬之官有行封爵

議勳庸稽功課之事咸以咨焉侍郎實二其長可不重哉

南豐

擬制

夫以天官之二治夏卿之選簿書繁重條格紛委苟非其

人則士之失職而無告者多矣

東坡集

天官四銓總覈人物澄

清流品

除孫覺制

文昌二卿位次八座

陸佃制

吏部古之天官

而侍郎小宰之職

曲阜傳堯俞制

謂

持行留藻鑑聽履上星辰注見素為吏部侍郎銓選平允

上星辰以言其親帝之旁杜南宮吾故人白馬金盤陀雄筆映

千古見賢心靡他舊注南宮為禮部非也按天官書南宮朱鳥

權行太微三公之庭將相執法即位衆星

古今事考

銓衡之任

唐掌選部流內六品以下官是為銓衡之任凡初仕進者無不

仰屬

通典

銓綜之司

考功員外郎劉思立子憲為河內尉思立今日亡明日選人有

索憲闕者時馬載為吏部侍郎書曰無行注冬集朝廷咸曰直

銓綜流品之司可謂振理風俗也

典選十載

楊纂長於吏道所在皆有聲績俄又除吏部侍郎前後典選十

餘載人論稱為允當

典選六年

事文類聚新集

卷之十一

十八

德壽堂梓

唐席豫為吏部侍郎玄宗謂之曰卿前為考功職事平允故有此授預典選六年有令譽又盧從愿精力于官偽牒詭功檢擿無所遺銓總六年以平允聞

並唐書

四代居選

房穎叔拜天官侍郎自其高祖至穎叔四代咸居選部時論榮之分紀

旬月即拜

何廣字伯始舉孝廉天下第一旬月為吏部侍郎

賜鏡以表

高唐馮為吏侍凡所銓綜時稱平允太宗賜金背鏡一面以表其精鑒焉

改職又除

唐崔玄暉拜天官侍郎每介然自守卻絕請誦頌為執政所忌轉文昌左丞月餘則天謂曰自卿改職以來選司大有罪過或聞令史乃設齋自慶此欲盛為貪惡爾今要卿復舊任又除天官侍郎

大革前弊

唐宋璟為吏書與侍郎李乂盧從愿等大革前弊取捨平允銓綜有敘

不省私書

孔緯字化文權要有所私託書盈几不省

並唐本

韋陟風采

韋陟遷吏侍郎選人多偽集與正調相冒陟有風采擿辨無不服者

裴楷風神

晉裴楷為吏部侍郎風神高邁容儀俊爽時謂之玉山照人

孝基知人

隋吏部侍郎高孝基鑒賞機悟清謹絕倫房元齡杜如晦與選孝基特加賞異後以為知人 隋書

行儉知人

裴行儉為吏部侍郎典選有知人之鑒見王劇與蘇味道謂人曰二子亦當掌銓衡之任後劇果為天官侍郎味道至相位

獎用孫張

王丘遷吏部侍郎典選復號平允其獎用如孫逖張鏡微皆一時茂秀

掌選韓元

吏侍鄭果注韓思復為太常博士元希聲為京兆士曹嘗謂人曰今年掌選韓元二子則吏部不負朝廷矣 唐會要

前有裴馬

唐裴行儉馬載為吏部侍郎同時典選十餘年甚有能名時人稱為裴馬

後有盧李

盧從愿睿宗時拜吏部侍郎中宗之後選司頗失綱紀從愿精心調理大稱平允李朝隱同時典選時人稱曰前有裴馬後有

盧李

弘景嚴正

韋弘景轉吏部侍郎銓綜平允權邪憚其嚴正不敢干以非道

岑義勁廉

岑義進更侍時崔湜鄭愔及李元恭分掌選皆以賄聞獨義勁

廉為時議嘉仰並本傳

汰擇士類

溫彥博遷檢校吏部侍郎彥博欲汰擇士類寡術不能厭眾訟

牒盈庭時議頗譏

甄別士庶

陸彥師為吏侍隋承周制官無清濁彥師在職凡所任人頗甄

別於士庶同上

識刀某姓

天官郎中李至遠權知侍郎時有選人姓刀又有王元忠並被
放乃密與令史相知滅其點書刀改為丁王改為士擬授官後
即添成文字至遠一覽便曰今年銓覆萬人總識姓名安有丁
士姓名此必刀某也省內以為神明會要

令裴畧朝

溫彥博為吏侍有選人裴畧被放乃自贊於彥博稱解嘲諛彥
博即令嘲屏牆略曰高下八九尺東西六七步突兀當廳坐幾
許遮賢路彥博慚而與官唐新書

李下無蹊

李知遠知選吏肅然歛手又號李下無蹊徑又李又進吏侍請謁不行時人語曰李下無蹊徑

本傳

李士多附

李季卿拜吏部侍郎俄而兼御史大夫奉使河南江淮宣撫振拔幽滯進用忠廉時人稱之在銓衡數年季卿有宇量性識博達與善人交襟懷豁如其在朝以進賢為務士以此多附之

與邊遠官

唐崔鄆判吏部京銓事文帝召三銓謂之曰卿等比選令錄如何注擬鄆曰資序相當問以為治之術見可否而擬之帝曰依資合得而才劣者何授對曰與邊遠慢官帝曰以不肖之才治邊民則疾苦可知也朝廷遠近皆願得人苟非其才人受其弊

尋拜吏部侍郎

便江南選

唐興元初劉滋為吏部侍郎往洪州知選事時言師興之後天下蝗旱谷價翔貴選人不得赴調乃命滋江南典選以便江嶺之人時稱舉職並分紀

開門無禁

姜晦為吏部侍郎性聰悟識理體舊制吏曹舍宇悉布棘以防令史與選人交通及晦領選事盡除之大開銓門示無所禁私引置者晦輒知之召問莫不首伏初朝廷以晦改前規咸以為不可竟銓衡得所賄賂不行舉朝服歎

選才得宜

劉林甫正觀初遷吏部侍郎初赴選者以十一月為始至春即
停選林甫奏請四時聽隨到注擬當時咸以為便時天下初定
州府及詔使多有赤牒授官至是停省盡來赴集將萬餘人林
甫選才銓擢咸得其宜時人以林甫典選比隋之高孝基選舉志

人推強直

韋陟嘗任吏部侍郎有一致仕官敘五品陟判之曰青壇展慶
曾不立班未綬承榮無宜拜臥詩人推其強直

帝謂勇決

隋楊恭仁大業初轉吏部侍郎楊玄感作亂煬帝制恭仁率兵
經略與玄感戰於破陵大敗之軍旋煬帝召入內殿謂曰我聞
破陵之軍唯卿力戰功最難比雖知卿奉法清慎却不知卿勇
決如此

吏不容私

蔡北海先生密禮維楊兵革之後省曹簿書殘毀幾盡公再執
銓衡時為吏部侍郎熟於典故衣冠調集與朝政洽革討論漫
無成案可攷者公援據該審徐出一言以決吏不得容其私詔
重刊七司條勅公所建明悉著于令自是省府除授皆有案驗
李益能撰行狀

吏不得肆

洪文安公遵字景嚴公為吏部侍郎先是選人諸曹改秩予奪
一出吏手公乃隨事疏理吏不得肆言行錄

陳擢孤寒

陳堯咨判流內銓舊制選人皆用奏舉乃得改京寺官而士有孤寒不為人知者堯咨特為陳其功狀而升擢之

仁宗實錄

孫論優伶

孫逢吉字從之進吏部侍郎朱公喜之去公力救之侍郎彭公龜年補外又言不應為近習而逐正人一日會食部中或報王喜除閣門祗候公曰此乃優伶嘗於內庭效朱侍講容止以儒為戲者豈可以汚清選當抗疏力爭否則於經筵論之飛語上聞內批為郡

樵政選集

厲色必容

苗晉卿知吏部選事性謙柔選人有訴訟索好官者雖至數千言或聲色甚厲者晉卿必含容之拜吏部侍郎前後典選五年政既寬弛胥吏多因緣為姦賄賂大行

點頭更擬

蘇晉為吏侍裴光庭知尚書事有過客被却者就籍以朱點頭而已晉因榜院曰門下點頭者更擬光庭以為悔已出晉汝州刺史

高枕而卧

許子儒以學藝稱長壽中官至天官侍郎子儒居選部不以藻鏡為意委令史勾直以腹心注官之次子儒但高枕而臥時云勾直平配由是補授失序無復綱紀道路以為口實

非錢不行

鄭愔掌選賦污狼籍有選人繫百錢于靴上人問其故曰當今

之選非錢不行

歐陽脩

雜著

謝轉吏部侍郎表

歐陽脩

驟膺渙渥備瀝愚誠雖至辭窮罔避煩言之為贖董乎今出莫
回成命於已行祗受以還驚惶失節臣某中謝伏念臣學未通
於原本材不足以經綸但知守拙以為忠每務師心而自信徒
以遭逢先帝拔自眾人久參侍從之聯遂玷機衡之二而屬大
橫啓兆嗣統膺期方為政之清明思百度之脩理內量譎薄實
憂以聖而責愚知迫衰殘方念乞身而告病不謂皇慈曲被寵
數屢加當覃大慶之初已無功而冒賞曾未踰年之久復進秩

以叨榮此蓋伏遇皇帝陛下聖政惟新用人務廣謂才難於求
備思悅使以忘勞憫其勤劬錫以優洽雖恩踰於望表亦寵與
其憂并誓殫犬馬之微少答乾坤之造

代謝吏部侍郎表

樓鑰

代言西掖方拜誤恩攝貳東銓復叨改命循墻莫避臨谷增危
中謝伏念臣獲落無堪迂愚自信正以經營於菽水故嘗希望
於斗升昨自外官恭趨嚴召猥廁內朝之鵷列親覩上聖之龍
飛五歷粉闈一參月寺籌邊戎幕無婉畫之可稱將命虜庭幸
歡盟之復締冒柱史詞臣之選兼官端寶牒之司初無左右之
先容盡出聖神之親擢忽承帝制俾倅天官一新龜紫之榮仍
假銓衡之長莫回成渙徒激懦衷茲蓋伏遇皇帝陛下虛以受

人明於分職憐臣孤立於官路借以末光謂臣曾歷於劇曹付之重委臣敢不寅遵邦憲嚴制吏姦朝夕論思雖素乏嚴吾之譽簿書期會庶免追裴馬之名

謝吏部侍郎表

鄒浩

代言西掖已冒至榮列職中臺更塵高選拜恩優渥撫已兢慚

中謝

竊以六典治邦周重天官之任三銓綜吏唐推文部之權

洪惟神考之正名肇復先王之成憲迄至今日益昭聖功宜得真才以貳選事而臣猥從廢斥特荷哀憐俄擢寘於近班獲預聞於機要事陛下有上帝敢萌一念之欺仰陛下何啻高山終乏纖埃之補未正空餐之責遽叨越次之升靖言思之可謂幸矣此蓋伏遇皇帝陛下孝隆繼志道廣用中欲多士之無朋

故孤立者與進欲四方之不擾故以愚守者并容爰舉斯心俾祗厥序臣敢不激昂遭遇勸勵猷為念此餘生實神聖之再造誓殫綿力稱寵祿之殊私

辭免除權吏部侍郎狀

吳永叔

渙若出綸震于聞命竊以甘泉扈從以侍臣為邦家之光選部典銓以小宰為人物之鑑匪疇宿望曷稱親除如臣者猥自遐陬躡登朝序才能甚短如鼎之不可以柱車文體近浮如玉之不可以為穀偶值清朝之更化忽陪群彥以同升繆當記注之筵復玷詞翰之選赤墀載筆幾瞻言動之容紅燭燃窻兩被傳宣之寵雖曰儒生之榮遇每慚往哲之高風方戒滿盈又叨甄擢官清易曠甫半歲而三遷恩重難酬不一月而再命倘冒承

事文類聚卷之十一
於殊渥恐交噴於煩言伏望聖慈俯矜愚悃於替書之未出擇
髦士之攸宜庶安私情允愜公論

第二辭免狀

吳永叔

重惟吏侍之選實高諸曹非知人之明不足以鑑裁流品非秉
法之正不足以檢扼吏姦比者某共貳之初以卯退朝以辰入
局典吏抱案選官滿庭愛惜分陰僅可區撥而才不周於繁劇
智不足於眇綿以所不能之人居所甚重之職因循之久易生
垢玩豈圖異渥復吳陳人若貪戀恩榮冒昧以處則必以庸疎
抵於曠敗欲望朝廷特賜敷奏得從寢免庶幾上不以累聖鑒
下不以溢愚分

辭免兼權吏部侍郎申省狀

洪咨夔

蒙恩便蕃聞命兢惕竊以詞垣四禁稽緩為先選部三銓繁劇
尤甚專掌尚虞於弗暨兼官必至於多違伏念某學問空疎材
識譎陋領內史之職舉乎一而未能參小宰之職共其二以何
有雖代庖而越俎將毀瓦而畫墁欲望朝廷特賜敷奏念御馬
不容於窮力而牧豎每患於多岐俾塵舊官亟寢新命少安愚
分實戴隆私

謝吏部侍郎表

周必大

嚴近叨居夙負瘵官之責武文迭試更膺換部之榮襲衣頒在
筭之珍寶帶錫童身之寵仰慙主眷俯愧輿言臣某
中謝臣聞
古之銓綜存乎人今之銓綜一於法存乎人固可以得士然其
弊也嘗由予奪之不公一於法固可以減私然其弊也或致賢

愚之同滯而况簿書紛若胥吏雜然苟稽察之弗精將混淆而莫辨欲酌古今之中制當令人法之竝行庶稍戢於吏姦亦少伸於士氣豈容虛受以累明揚伏念臣性鄙習迂志卑才下早親翰墨弟為書生陳腐之談久侍軒墀初乏禁從論思之語引去則殊私之未報欲留則高位之難安方進退之靡寧忽選除之下逮肺腑抱履冰之惧面顏形撻市之羞被此光靈若為稱塞茲益伏遇皇帝陛下乾行不息日照無私知人非堯舜之難巧壬奚患選衆有臯陶之舉枉直自分夫何一介之臣乃冠貳卿之列臣敢不遵承法令振拔滯淹雖微冰鑑之明上裨睿哲願守權衡之信仰助公平苟不辱知斯為報國

謝吏部侍郎兼權直學士院表

孫覲

承流支郡方叨左省之除擢貳選曹更代北扉之直寵恩深厚

小已凌兢

中謝

臣聞虞書三載黜陟之文周官羣吏誅賞之法

歷時千載分總四銓圖籍浩繁官曹猥衆諸郎寄坐老吏專家二年于戈倣擾之餘一時水火焚漂之後千瘡橫潰三窟旁穿世號杞樵坐嘲銅臭士無固志端若視馬曹然官不郎工但直書紙尾耳深惟流弊常激懦衷使夫人皆從容而自居則誰當以奮發而為意攬轡而上粗有意於澄清奏刀欲前了無施於盤錯空慙綿力實負初心茲益伏遇皇帝陛下剛德方亨大明繼照深鑒百王之弊一清多士之源偶以乏才遂當殊獎圖難有欲速之戒矯枉在馴致之功輸夙夜之勞儻遂愚公之志效涓塵之報庶逃黜伯之譏

吏部郎中

歷代沿革周官太宰屬官有下大夫蓋郎中之任也秦有郎中以其為郎侍衛居中故曰郎中漢選尚書郎初從三署郎次補之初入尚書臺稱郎中滿歲稱侍郎故郎中之名猶因三置舊號後漢置吏部郎中職在選舉魏晉用人妙於時選其諸曹郎功高者遷吏部郎中歷代品級皆高於諸曹郎魏晉宋齊吏部郎品第五諸曹郎第六梁吏部郎品第四班第十一陳因梁後魏北齊吏部郎品正第四上諸曹郎品正第六上後周依周官隋煬帝改吏部郎為選部郎唐吏部郎中二人龍朔二年改為司列大夫咸亨光宅神龍並隨曹改復一人掌小選未入仕而吏京司者復分九品通謂之行署其應

選之人以未入九流故謂之流外銓宋元豐官制行置吏部郎中四人尚書選二人侍郎選各一人參掌選事而分治之凡序位有品選官有格分任有職寓祿有階皆以事稽攷審核其狀質成於長二而後行焉建炎三年詔三選各一員仍唐宋舊置吏部郎中二人

羣書要語乃統胥徒是稱小選

席子楊仲宣碑

六官之屬曹郎

首之

白集除李見制

參我六典冠于諸曹

云

有簿書以旌淑

愿擇刀筆以决臧否剖疑析滯揮翰如流選部以清繫公是賴

並同上

銓衡庶品歷選賓僚

六儒表

才盛居東之佐禮處司南

之重高選髦士以分劇曹

常集鄭貞外制

天官之屬號為劇曹

初察王琮制

任參六典選重一時

類要

尚書正本而吏部天官

綜敘羣才以成天下之治郎於典領其選甚高

南豐除曹稷制

詩句吏部提英鑒片善蒙采錄

黃山谷

吏部信才傑文鋒振奇

響調與金石諧思逐風雲上

梁沈約悼齊謝朓

兩人同日事征

西今日君先捧紫泥

裴度柳公綽俱為判官公綽先入為郎度以詩餞云

古今事實

超遷郎中

後漢吏部郎典劇多超遷者

稍遷郎中

齊庾杲之司空劉覲見而奇之曰是使江漢崇望杞梓發聲稍

遷吏部郎中參選大事

齊書

舉一吏部

後魏漢文帝創革舊制選置百官謂羣臣曰為我舉一吏部郎

合即三日假尋曰朕已得之矣乃徵崔亮為之亮自參選事

三十年廉謹明決尚書曰非崔郎中選事不辨

北史

不見一吏部

褚亮每屬恒彞覓一佳吏部彞曰與縣宰徐寧海岱清士即遷

吏部

崔亮明決

見上舉一吏部

劉鼎風稜

劉鼎清太中為吏部郎中兼侍御史知雜事鼎性若寬易而典

選曹按吏有風稜

五代史

阮咸寡欲

山濤舉阮咸為吏部郎中曰清直寡欲萬物不能移也 世說

陸倕正人

吏部郎典碎事日夜相接非但當正已而乃當能正人議郎杜
點德履亦佳太子庶子崔諒中郎陸倕皆有意正人其次不當
審有可用者否 山濤啓事

設長名榜

吏部郎中裴行儉始設長名榜列銓注期限等法又定州縣升
降官資高下以為故事長名榜自此始也 選本志

定朝儀令

後魏鄒淵博覽經書太祖定中原擢為吏部郎淵明解制度多
識故事與崔玄伯參定朝儀律令音樂及國文記詔策多淵所
為也

傾朝送別

何尚之字彥德為吏部郎告休定省傾朝送別及至郗父叔度
謂曰聞汝來此傾朝相送可有幾客荅曰殆數百人叔度笑曰
此是送吏部郎中非關何彥德也昔殷浩亦嘗作豫童定省送
別者甚眾及廢從東陽船泊征虜亭積日乃至親舊無敢相窺
百姓追送

百姓追送

褚翔為義興太守徵為吏部郎去部百姓老少追送出境翔居
小選公清不為請囑易意號為平允選侍中

庭植嘉樹

顧憲之為尚書吏部郎其祖凱之嘗為吏部於庭中列植嘉樹

謂人曰吾為憲之植爾後果為此職

師為模楷

隋李德林為吏部郎陸昂命其子與德林周旋誠之曰汝每事宜師此人為模楷

尉得遷官

晁補之字無咎為吏部郎中有嶺外尉為獲盜八人法當改官考功謂獲盜不同處曲沮其賞持之不決尉客京久窘甚詣公訴之公憫然一日當奏郎為上之七日得遷官於是吏畏服部無留事 丁未錄又見張文潛集

上常目送

曾肇謚文昭官制行除吏部郎中每便殿引選人上常目送之

出殿門而已

楊龜山撰行狀

古今文集

雜著

吏部郎中廳壁記

獨孤及

太微五帝星座後五星曰郎位秦漢之君則而象之乃建郎中至魏世祖分尚書曹為六郎各六人今之吏部魏之選曹也掌選舉銓覈以正公卿大夫士羣吏之品位凡廢置之柄官府之序歲終今天下郡縣會計致事而郎官起草立議操而成之然後尚書受成於郎中之選非楚金百鍊顏弓六鈞不與也故居官者不由選曹郎而進罔以見其才之餘地亦尤刀劍之刃未嘗屠大牛切大玉則雖曰我且以為鑊鉞人猶疑之由其塗

而升驟必環周三臺翰飛兩掖登喉舌秉刀尺者什七八諸曹
郎莫敵也歲在乙巳河南賀若公用貞幹諒直實涖厥位往歲
公為外部也東曹朗然如得水鏡治餘杭也吳人熙熙若逢陽
春今也來思八法在手操割成務彌綸舊章厥如初政常以前
哲軌躅我之韋絃而武德以來解署鼎新者數官曹易名者五
若姓不表年不紀是廢德也將來何觀故謹而列之俾我曹之
春秋存乎右座其選部司列天官文部之目各因其所革時之
先後冠於其首以為志云

吏部員外郎

歷代沿革 **周**官太宰屬官有上士蓋今員外之任也 **漢**百官階
次有員外郎 **後周**依周官 **隋**文帝開皇六年尚書省二十四

司各置員外郎一人以司其曹之籍帳品從第六謂曹郎本
員之外復置郎煬帝三年廢尚書 諸曹各置員外郎一

人吏部置二人 **唐**龍朔咸亨光宅神龍並隨曹改復 **宋**尚書

諸司員外郎正七品 **元**置吏部員外郎二人

羣書要語吏部員外郎掌選院謂之南曹 **唐**其曹在銓曹之南

故謂之南曹 唐六典 吏部員外郎二人掌文選以三銓之法官

天下之材其投試銓注與流內畧同謂之小選 唐百官志

吏部信才傑文鋒振奇響調與金石諧恩逐風雲上 梁沈

約齋謝朓 吏部提英鑒片善家采錄 黃山谷 今日君先捧紫

泥 柳公綽與裴度俱為判官綽八為吏部郎度作詩餞云

古今事實

唐文苑英華新集 卷之十一 三三 德壽堂

吏部省眼

唐吏部郎中二廳先小銓次格式員外郎二廳先南曹次廢置
舊說吏部為省眼 分紀

南宮眉目

韋陟字商衡為吏部員外郎是曹在南宮為眉目在選士為司
命公執直筆閱簿書紛拏盤錯一瞬而剖 劉禹錫撰神道碑

銓敘稱美

唐崔郾資質秀偉神清重雅人望而愛之為吏部員外郎奸吏
不敢欺寒無援者不至流滯銓敘之美為時所稱

判析有條

唐李栖筠遷吏部員外郎判南曹栖筠判析有條奸吏氣奪號

為神明

簿最詳緻

韓滉遷吏部員外郎性強直明吏事在南曹五年簿最詳緻

吏事第一

裴遵度遷吏部員外郎專判南曹天寶中海內無事九流輻輳
會府每歲吏部選人盈萬遵度敏識強記精覈文贍詳而不滯
時稱吏事第一由是大知名

鈐制官吏

唐皇甫鏞為吏部員外郎判南曹凡三年頗能鈐制官吏改吏
部郎中

旌別能否

唐牛徽遷吏部員外郎乾符中選曹猥濫吏為奸弊每歲選人四千餘徽性貞剛特為起請由是銓敘稱正能否旌別物議稱之

思制吏奸

紹興三十年以劉珙為吏部員外郎珙在銓曹時苦吏為奸思有以制之一日命張幕設案置令式其中使選集者得出入繙閱與吏辨吏無得藏其巧人甚便之

復清選部

劉崇望字希徒轉吏部員外郎崔安潛為吏部尚書崇望判南曹滌除宿弊復清選部

唐書

朕欲見久

陳傅良奏事入脩門鬚鬢如雪丞相留公正一見歎曰幾年陳君舉尚可使外補即奏留為吏部員外郎初對上曰卿去國幾何時朕欲見卿久矣知卿抱且學問深醇有所著書進來時上臨朝淵默罕有聖語公敬謝而退以周禮說進擢秘書少監

樓
攻魏集

上為矍矍

張拭召為吏部員外郎廟堂用史正志為發運使奪州縣財賦遠近騷然拭為上言之上曰正志以為非取之民對曰今州縣財賦大抵無餘不過巧為之名以取之於民耳上聞之矍然顧拭曰論此事者多矣未有能及此者如卿之言是朕假手於發運使以病吾民也閱實如拭言即詔罷之

楊誠齋集

古今文集

雜著

吏部員外郎南曹廳壁記

權德輿

漢廷尚書郎辨草制度主文書起草之任東漢方冠以曹名用諸曹功次超卓者轉遷選部魏晉已還其任寔劇國家紀律昭明官脩其方凡薦紳之倫未命為大夫者滿歲皆調於谷下啓事賦祿必先有司初上元中天官趙郡李敬玄號為稱職以覆托官簿差次裁成端本肇末不得不重乃請外郎一人顯南曹之任其後或詔同曹郎分主之或詔他曹郎權居之皆難其才而慎斯舉也大抵膺是命者多士必屬耳目焉以其公私能否之間不可遏也以事之委會吏之奇表因緣詭故中若市道居之者通明闊畧靡或深刻苟成績於是則翰飛不暇登二掖贊六職得之夷易疾若傳置太原王仲舒字弘中温毅廉直清方敏資風神豪爽邁乎羣倫貞元十年冬由諸侯部從事賢良對策歷一右諫列議曹考功郎十八年實受斯命類能故也於是用堅明忠恕行理官業程品具舉尤違自絕然後以狀之成質於冢宰小宰罷退者不讀受祿者不誣恢恢然投其虛而芒刃不頓君子以弘中之道為折中矣昔春秋書士谷曰堪其事也魯語曰署所以朝夕度君命也上因官署而舉事任春秋丘明之志也至若龍朔咸亨改復之說此皆不書

封誥科

應給制誥

更部分掌

應封蔭

贈遷

舊司封

歷代沿革舊主爵郎正齊置主爵郎中一人隋文帝為主爵侍

郎煬帝改為主爵郎唐龍朔二年改司封大夫咸亨元年復

故光宅元年改司封郎中神龍元年復故開元二十四年復

為司封宋於右掖門置院四司誥身案並集于此以備中書

除改本司郎官各主其事淳化五年始專置官司於省內凡

官誥各以本司誥身印印之文臣用吏部武臣用兵部王公

命婦用司封加勳用司勳掌文武官將校誥身及封贈官誥

院提舉一人以知制誥充判院一人以帶職京朝官充元封

五年行官制文武誥身屬吏部蕃官誥屬兵部封贈及命婦

誥屬司封加勳并將校告屬司勳官誥院四部誥身案及吏

人隨事隸本部七年併司封司勳誥身案入吏部預書庫收

掌崇寧四年吏部專置造官誥局五年罷令尚書右選主管

大觀元年復置尋改為官誥院仍隸左右司三年復罷歸吏

部政和三年六月詔依舊置官誥院差官二員主管少府監

鑄印記吏部製造誥身案記為文建炎以來因仍不改元無

專曹官封誥以令史分頭掌之

羣書要語司封郎中掌封命朝會賜予之級凡爵九等

封爵之恩施於內外國之典也主以郎吏寵秩甚優

王祖道制宜寵左曹之秩用優主爵之名

古今事實 胡文恭制

執秩

晉文公作執秩以正其官注執秩主爵之官

左傳

唐官志

曾南豐除

德壽堂

典封

後漢馮勤為郎中給事尚書使與諸侯封事

本傳

公權八奏

唐柳公權為司封員外郎入奏帝曰見卿筆蹟久矣因問用筆

法權曰心正則筆正乃可法矣

本傳

孝武同省

正觀中韋孝武為主爵郎中與兄弟同省時號三列宿

唐史

上科舉議

宋王介甫用事議論素異還朝寘之官誥院介甫欲變更科舉

上疑焉公議上悟曰吾故疑此得蘇軾議意釋然矣即日召見

蘇頌濱集東坡行狀

此代言手

宋京鏗字仲遠參政龍茂良薦公于孝宗轉主管官誥院先是

茂良帥豫章日得公牋奏之文奇之曰此汪彥章代言手也充

職兩月詔從臣舉良縣令為執法官給事中王希呂以公應書

即召見曰卿議論通明有用材也是日除監察御史

楊誠齋集

古今文集

雜著

官誥院題名記

虞似良

士自一命以上至于公卿凡除授誥命必繇院以給之則居是

職者為甚重而不輕矣故謹其付給而守其貳令視他司為嚴

唐制百官誥身分掌於其所部文則吏部掌之武則兵部掌之

事文類聚新集 卷之十一
宗室命婦司封掌之考校勳績司勳掌之國初悉因唐舊置院於右掖門之左凡吏兵封勳四司之告舉集諸此淳化五年始專置局命中書舍人一員提舉而以朝官一員判局事於是職任踰重元豐改制乃以文武官誥身悉隸吏部而以蕃官隸兵部崇寧大觀或置或不大抵廢則皆歸吏部右選政和復置院仍差主管官二員中興以來因仍不改然自紹興至今四十餘年中間官吏殆無有記之者名氏則罷滯不可見事之因循苟且豈特此哉似良不才承乏是官思有以紀會同寮魏君相與討究自薛僊而下得五十五人勒諸石庶使來者尚有考也乾道七年十月旣望記

官誥院續題名記

丁伯杜

誥院題名石昉於乾道七禩紹興改元易而大之紹定辛卯之秋鬱攸爲沴屋與石俱燬營建旣新亟求舊題副墨壽之石立新石列爲二經始於趙君與憲成於林君杲謂余曾居是官諗識之鉄惟皇朝以名噐砥礪天下士命詞於西掖而受給於誥邸要使爵德賞功之意雷行域中光被萬物所係亦大矣在昔名公率多發軔于此不但伉台衡持從橐登要路爲足垂榮某人節行著聞某人勲業赫奕一目畢見使來者知所勸是亦補助教道之一紹定六年十一月旣望記

官誥院續題名記

汪詢之

乾道辛卯官誥院始創題名石易乎紹熙庚戌燬于紹定辛卯今江淮大使官文趙公與憲來允厥職爰立二石鴈行之后二

十七年當寶祐六年石當續僕適承乏乃暨同僚姜君士龍闔
 辭以諗于公公捐楮二千緡佐其費及在外麾節之曾居是官
 者致助各有差于是石續而三矣恭惟國朝以好爵縻天下士
 文武之臣各以其職受命而榮辱予奪之機乃寄於盈尺之誥
 司存顧不嚴且重歟凡得策名於石者當以羔羊素絲之詩厲
 其節以綱末惡文之質養其才又以朝廷之所以懋德懋功者
 自懋其器業使前者規後者隨輝聯光映聲實流國家將於
 是有賴焉豈直能大其官而已是年五月既望記

勳封科

應封食邑實封 如王一萬戶郡王五千戶之類又親王
 公主應國封號之類 ○舊司勳

歷代沿革周官有司勳上士一人凡有功者司勳詔之後周夏

官有司勳一人掌功勳之賞隋文帝立司勳侍郎二人煬帝

改為司勳郎唐武德初為司勳郎中龍朔元年改為司勳大

夫掌邦國官人之勳級凡勳十有二轉自上柱國至

武騎尉凡十二 凡有功之人合授勳官者皆委之覆定然後

奏擬宋司勳掌賜勳定選錄用世勞凡官吏軍民應賞而隸

有司施行者則審覆而駁其謬誤元無專曹官有勳封科以

令史分頭掌之

羣書要語司勳掌六卿賞地之法以等其功王功曰勳國功曰

功民功曰庸事功曰勞治功曰力戰曰多凡賞無常輕重職功

周禮 掌校定勳績論功行賞 職負令

古今事實

事文類聚新集

卷之十一

四十一

德壽堂梓

詞人稱首

唐張九齡遷司勳負外郎張說謂人曰後來詞人稱首 本傳

郎吏得人

唐張循憲薦張嘉貞奏對倡倡武后悅擢循憲司勳郎中酬其得人時功狀盈几郎吏不決嘉貞即為詳處廷無留牒 張嘉貞傳

論安石配享

宋趙忠簡公鼎字元鎮公為司勳郎官乃言自王安石用事肆為紛更祖宗之法掃地而生民始病蔡京托名紹述盡祖安石之政以致大患今安石尤配享廟廷而京黨赤族何以收人而召和氣哉 言行錄

遠秦檜擅事

宋陳文正公康伯字長卿自公為郎 時為司勳郎官 秦檜方擅事公雅有素望乃澹然其中檜雖稱公靜重常越用他人公不以為意在省五年始為軍器監 同上

考選科

諸科選	文資選	右職選	官中選
諸司選	除由	磨由	司計
監當官別置外選		舊考功	

歷代沿革 漢曹郎二人掌天下歲盡集課元帝時京房作考功課吏之法然其職不在尚書至光武改尚書二公曹主歲書考課課諸州郡 魏尚書郎曹有考功郎中一人 宋齊並置功論郎中梁有功論侍郎 隋文帝置考功侍郎煬帝改考功郎 唐龍朔改為司績大夫武德舊令考功郎中監試貢舉人正

觀以來乃以考功員外郎專掌貢舉省郎之殊美者至開元
移貢舉於禮部而考功員外郎分判而已宋考功判司事一
人以帶職朝官或無職事朝官充凡考課之法分隸他司或
以他司專領本司但掌覆大常擬謚及幕府州縣官流外較
考之事元豐官制行郎中員外郎始實行本司事續會要初
除蔡响蔡京職畧掌文武遷叙磨勘資任考課之政令凡命
官隨所隸選以具職事具注於曆給之於其屬州若司歲書
其功過應升遷送授者驗曆按法而敘進之有負殿則正其
罪罰以七事考監司以四善三最考守令凡改服色者以年
勞計之應謚者覆大常所定行狀報尚書省官集議以聞凡
立碑誌名額之事掌之舊置考課院其定殿最皆有考辭元

無專曹官有考選科以令史分頭主之

羣書要語掌文武百官功過善惡之考法凡百司之長歲較其
屬功過善惡以九等大合衆而讀之流內之官敘以四善善狀
之外有二十七最唐百官志及功臣家傳碑頌誅謚等事同上

主羣吏之課而議其誅賞郎於天臺任屬尤重會南豐除蔡京制

計羣吏之治而明黜陟之法臺郎典引列於左曹又除呂和卿制

補意新官又少年秋清身健好朝天白樂天送崔考功

古今事實

鶴廳

唐考功員外郎廳事有薛稷畫鶴宋之間為贊西京雜記

南曹見後裴諝事

事文類聚新集

卷之七

四七

德壽堂

挾印赴行在

唐裴諝遷考功郎中代宗幸陝諝徒挾考功南曹印赴行在上
曰疾風知勁草本傳

墨書絕吏奸

唐王徽轉考功員外郎時考簿上中下字朱書吏緣為奸多有
指改徽白僕射請以墨書

鄭澣敏識

鄭澣為考功員外郎刺史有驅迫人吏上言政績請刊石紀者
澣探得其情條奏廟使巧迹遂露人服其敏識分紀

仲舒文名

王仲舒有文名遷考功員外郎奏議許雅省中伏其能

辭判精密

裴均遷考功員外郎侍郎鄭珣瑜考核辭判研覈精密皆值才
實

典選平允

嚴挺之開元中為考功郎中典選二年大稱平允並本傳

進繼清明

席豫遷考功員外郎進繼清明拜吏侍元宗曰卿考功職詳事
允故有今授

黜陟詳當

趙宗儒傳正元六年領考功事黜陟詳當無所回避
不避權倖

穆宗即位召李渤為考功員外郎校定京官考不避權倖皆行黜陟

務覈實才

唐王丘傳開元初遷考功員外郎異時多請託丘務覈實才

吏無以欺

王仲舒字弘中在考功吏部提約明悉故吏無以欺韓文正公神道碑

人以為便

考功員外郎魏砥字邦達守監察御史砥在考功郎選案牘不存吏緣為奸川陝官到部者多以微文沮抑往反輒經年砥請細節不固處悉先放行人以為便中興系年錄

非蘇不可

韓休作蘇題集序云屬考功員外郎闕時中書令李嶠執筆曰考功郎非蘇君不可遂拜考功員外郎

得王遂清

王信字成之權考功郎有選人張公選初一年免銓至是改秩吏妄引復令扼之公鈎察其故吏怖服又有三蜀士實礙武吏受賂為道地趙衛公為工書以囑公持弗聽已而轉臨天官閣審成積拊掌愧歎嗟激不已至白于上前他日上謂尚書蔡洸曰考功得王信銓曹遂清邏者私相詣指為神明同上

謚改文莊

宋劉敞判尚書考功仁宗賜夏竦謚曰文正敞言謚者有司之事也竦之行邪而陛下謚之以正不應法疏三上仁宗為更竦

謚曰文莊

東都事畧

選指神明

見上得王遂清

古今文集

律詩

送考工崔郎中赴闕

白居易

稱意新官又少年秋涼身健好朝天青雲上了無多路却要徐

驅穩着鞭

詩話

專心望考工

唐王尚客為侍御史自以才望清華妙當入省常望前行忽降

膳部員外郎微有惋悵張恭忠詠曰有意嫌兵部專心望考工

誰知脚酸脰却落省牆東

新編古今事文類聚新集卷之十一

終

事文類聚新集

卷之十一

四五

德壽堂

新編古今事文類聚新集卷之十二

南江

富大用

時可

編

金陵

唐富春

子和

刊

六曹部

戶部尚書

歷代沿革

戶部尚書周之地官卿也漢置尚書郎四人其一人

主財帛委輸成帝置尚書五人其三曰民曹主人吏上尚書

事後漢以民曹主繕脩功作當工官之任吳有戶部魏文帝

置度支尚書等專掌軍國支計又置左民尚書晉初省別有

度支皆主筭也惠帝時有右民尚書梁陳置左戶尚書並掌

戶籍知工官之事後魏北齊有度支尚書後周置地官府大

司徒卿隋初有度支尚書則并後周民部之職開皇三年改度支為民部唐因之貞觀改為戶部龍朔改為司元太常伯光宅改地官尚書神龍復為戶部宋初除安燾為戶部尚書元祐元年門下侍郎司馬光欲令戶部尚書兼領左右曹而舊三司財用事有在五曹寺監者並歸戶部則利權歸一詔尚書省立法左右曹錢穀尚書兼總使周知其數量入為出而制國用元仍唐宋舊置戶部掌民籍貢賦官吏俸祿府庫倉廩歲計支用權衡度量法式坑冶錢幣寶貨恩賜之事置令史分掌名頭尚書為之長

羣書要語二曰地官其屬六十掌邦教周禮司民掌登萬民之數自生齒以上皆書于版大司徒之職掌建邦土地之圖與

其人民之數以佐王安擾邦國以天下土地之圖周知九州之地域廣輪之數而辯其邦國都鄙之數制其畿疆而溝封之以會土之法辯五地之物生因此五物者民之常有施十有二

教焉同上司會主天下之大計計官之長若今尚書周禮注大

司徒齊戒受質以百官之成質於天子記王制司徒脩六禮以

節民性明七教以興民德齊八政以防淫一道德以同俗同上

帝曰契汝作司徒敬敷五教在寬書舜典農父若保酒誥司徒

掌邦教敷五典擾兆民周官穆王命君牙為周大司徒弘敷五

典式和民則君牙鄭武公父子並為周司徒善於其職詩緇衣

序祝鳩氏司徒也左傳地官理財能制於輕重唐太詔令崔羣

制掌司徒之邦教制民曹之地征綜事帥屬居其要會幹時通

才如可典領常集制昔元凱之處斯職法司施行者五十餘條

以資當時之急同上虞書五教實委司徒之班周禮六卿爰開

地官之位莫不織成都邑編輯氓黎設九土之綱維成四方之

管轄班固申犬牙之制疆場綺分應璩論馬齒之規井田鱗次

戶標九等俱陳萬國之圖人有十倫竝掛三年之籍張鷟集注

西都賦曰疆場綺分又云原隰龍鱗之次應璩詩曰九州相錯

雜相次如馬齒九等攸辯百姓以親唐制戶部之於中臺為

周司徒之職南豐擬制民曹上卿同上序首曹於左輔歲奉類

宜參司會之職以裨經費之方同上紫極八座非德莫居丹屏

六曹惟賢是擇唐授李承嘉戶部尚書制亦總地卿掌會計而

經國紀綱式敘征賦益饒崔鉉制及領地官且司邦賦會計事

剝出納孔殷投利刃而皆虛委夔夔絲而必理裴均制

古今事實

明公展足

景雲中盧從愿為吏部侍郎杜暹注鄭縣尉後為戶部尚書盧

自益州長史入朝杜立於上乃曰選人定何如盧曰亦由僕藻

鑑遂使明公展千里足

內相預政

王琚佐明皇平內難為戶部尚書帝於琚眷委特異預大政事

號內宰相並本傳

拜官令早

蔡景歷拜度支尚書舊式拜官在日午後景歷拜日適逢輿駕

事文類聚新集

卷之十二

三

德壽堂辛

幸玄武觀在位皆侍宴帝恐景歷不預特令早拜其見重如此
歲遷自擇

唐高宗以竇德玄舊臣自殿中少監為御史大夫歲中遷司元
太常伯又任十餘人皆帝自擇 會要

在內七年

晉杜預在內七年損益萬機不可勝數朝野稱之

主計八年

唐王紹進戶部尚書眷待甚厚主計凡八年政事多咨訪紹亦
未嘗一言漏於人 唐說

兄省許入

劉洽為御史中丞漑為左民尚書舊中丞不得入尚書下舍洽
引服親不應有礙刺省評決乃許入漑省亦以兄弟素篤不能
相別也

從兄同榮

唐鄭善果為民部尚書制與裴寂等十人每奏事及侍立竝令
升殿與從兄元璠在其數時以為榮 分紀

張華王佐

張華為度支尚書有王佐之才

杜預武庫

杜預為度支尚書號杜武庫言無所不有 並本傳

祿給白衣

梁何胤為左民尚書後辭官隱于若耶山雲門寺勅給白衣尚

書祿胤固辭

歸讓版使

韋煥辭判戶部歸謂甥姪曰已讓版使矣

佳話錄

清儉不改

晉吳隱之為度支尚書以竹蓬為屏風坐無氈席後遷中領軍

清儉不改每月所得祿纔留身糧餘悉分賑親族

本傳

清白自脩

劉溉為左民尚書溉美風儀善容止所至以清白自脩性又率

儉不好聲色

梁書

鄭有善績

唐鄭善果檢校大理卿兼民部尚書正身奉法甚有善績

崔有風望

崔從字子又為戶部尚書為人嚴偉立朝稜稜有風望

本傳

掌計何憂

魏文帝置度支尚書專掌軍國支計朝議以征討未息動須節

量及明帝嗣位欲用安平王孚問左右曰有兄風否荅曰似兄

帝曰吾得司馬懿二人復何憂轉度支尚書

晉安平王孚傳

備物置用

杜預為度支尚書內以利人外以救邊備物置用濟當時之益

者五十餘條

儲義倉粟

長孫平開皇三年為度支尚書見天下州縣多罹水旱百姓不

給奏令民間每秋家出粟麥一石以下貧富為差等儲之間里以備凶年名曰義倉隋書

掌戶口政

唐戶部尚書掌天下戶口井田之政令凡徭賦職貢之方經費調給之筭藏貨贏儲之數悉以咨之六典

改授刺史

唐太宗幸翠微宮授司農卿李緯民部尚書房元齡時在京城畱守會有自京師來者太宗問曰元齡聞李緯拜尚書如何對曰但云李緯好鬚更無他語太宗遽改授緯潞州刺史

少息貪吏

宋朝李常字公擇號山房為戶部尚書常文士少吏幹或疑不勝任以問司馬光光曰使此人掌邦計則天下知朝廷非急於征利貪吏望風培克之患庶幾少息長編

作會稽錄

李常為戶部尚書作元祐會稽錄三十卷本傳

置裁省局

韓忠彥字師朴謚文定召為戶部尚書時元祐會稽錄初成入狹而用廣忠彥憂之因言欽節財用遂裁省冗費置局於戶部本傳

古今文集

雜著

讓地官尚書表

李嶠

無涯之恩忽降霄極非據之惕坐驚魂宇某中謝臣少無竒志
長乏異能短步非疾於驕騶翺飛自同於燕雀逢聖神之再造
屬天地之蕙容鄭璞齊竿竊混聲價秦冠漢綬叨踐名級步鴛
池之清切陟鸞渚之便蕃出入五臺周旋三閣行膺負壘之任
遂服專車之寵萬機損益蔽於庸陋之心百揆謨猷滯於膏肓
之疾爰發皇揆特留宸眷假優閑之秩雖入杏壇參翊亮之謀
尚和梅鼎徒延丹楫之譽竟微股肱之效挈瓶之智患在於空
虛瞰室之災惧深於盈滿方陳骸骨之請遽荷雲霄之命負乘
之責前謫未除忝越之譏後恩仍及還振蜉蝣之羽欲參龍鳳
之行赤紱妨賢物知不可素殮得位臣亦胡顏况八座樞機五
曹要劇上儀七星之象旁理萬邦之教自非元凱之明允忠肅

陳韓之敦璞淳深將何以釐正版圖擾安邦國臣之淺狹誠則
貪叨朝有典章敢叨非望伏乞回乾坤之曲澤收雨露之殊私
廣訪訐謨詳求棫樸更引食場之彥俾臨均土之司則受任得
材無德振鷺之美官方有序不失貫魚之次

辭免除權戶部尚書狀

真德秀

文昌在從列爲最高版曹於國計爲甚重自仲由之才聖門僅
許以治千乘之賦况如臣之不肖而使攝大司徒之職治天下
之賦其爲不稱亦已明矣伏念臣曩負罪愆衆所指目保全覆
燾盡出聖君居間數歲而予之祠奉祠踰年而吳之郡甫及下
考遽帥全閩感激恩光磨礱朽鈍每思興悠久之利不敢徇苟
且之謀私願朝廷假以歲月庶幾斯人受一分之賜少寬九重

不忘遠之憂區區寸忱可以對越實無一念別覬寵榮豈圖到
官俶爾四月絲綸之命忽降自天仰惟陛下更化以來大明黜
陟英髦濟濟聚在闕庭臣於是豈不願親近日月之光造跡鶴
鴻之列而自量蹇劣莫副選掄冒昧而前必致顛踣伏望聖慈
俯照忱悃收回渙汗用穆師言

再辭免戶部尚書狀

真德秀

需童有請渙汗未回讀溫詔之丁寧重微衷之感激伏念臣雖
乏通明之識粗知去就之宜昔政在私門固合進難而退易今
權歸公室所當朝召而暮行矧惟去國之十年常切愛君之一
念每愁無路可輸獻敵之忠詎意逢辰重瞻天日之表身未離
於閩嶠心已驚於闕庭蓋卽敬承敢云固避惟是天臺高選地
官劇曹位在納言難踵夔門之武職專治賦媿亡晏笑之才僭
瀆睿聰冀還宸渥或改司於閒局或仍綴於舊班庶幾上無濫
予之嫌器名增重下免僥逾之媿庶耻獲全

謝除戶部尚書表

真德秀

十連竊寵媿藩閩之罔功一札遄歸叨地官之進長班躡陪於
踐斗懼深重於履水中謝伏念臣素守朴忠濫膺迪簡曩被初
元之召首躋邇服之榮自退屏於山林寢遯違於軒陛憂時之
髮益白悵去國之十年戀闕之心爲丹敢忘君於一飯屬蒙起
廢再玷承流皂蓋分符氈復旣還於舊物青冥授鉞綉行仍忝
於故鄉曾坐席之未溫忽賜環之已及方躬攬宏開於公道而
彙征必萃於群賢敢圖孤跡之漂流亦辱清朝之記錄且民部

周司徒之職豈惟稽戶口於版圖顧尚書古納言之官蓋實專
喉舌之樞要誤拜演綸之渥冒陛下乾剛天健蓄懿日新親庶政以厲精大
負茲益恭遇皇帝陛下乾剛天健蓄懿日新親庶政以厲精大
明黜陟臨百官而昭德洞察忠邪念臣嘗參紫橐之聯知臣粗
厲素絲之節輟還近綴俾侍清光臣敢不期稱隆私勉堅初志
生財有道雖慚源流本末之知事君勿欺願竭獻納論思之報

辭免戶部尚書狀

孫覲

竊以羣胡南牧大駕東巡奸雄奮臂而呼將士倒戈而至千官
逃散萬室驚奔芻糧委於煨燼之餘金繒捐於寇盜之手理兩
朝衰亂之緒仰繫上智之明振一時乏絕之憂當重計臣之選
吝有司之出納制萬貨之低昂孰能披軼於肯綮之間多多益
辯是宜審聽於音聲之際一一而吹選任或非其人誤國莫大
於此如臣者本以簿書刀筆備藩宣之寄又以文章言語參侍
從之華忽被詔除俾承人乏今廊廟禦戎之急惟兵民足食之
先宜得命世經綸之才安用老生陳腐之說智有所不及甚虞
操刀製錦之傷猶有所不為何預越俎代庖之事

戶部侍郎

歷代公 煬帝始置民部侍郎**唐**因之後改為戶部龍朔二
年改為司元少常伯咸亨元年復為戶部侍郎**宋**戶部之職
皆歸三司元豐官制行戶部始總邦計置侍郎二員左曹五
案 戶口案稅賦案農田案檢法案知雜案
免役案坑場案檢法案知雜案
左曹除陳安石右曹除李定

紹興四年七月詔戶部侍郎二員通治左右曹職事以權吏部侍郎劉岑有請故有是命元仍唐宋舊置戶部侍郎

羣書要語

小司徒之職掌建邦之教法周禮地官之職邦教是

先必選國華以從人望韓退之除崔羣制下制民產上經國用

地官之貳實參總焉南豐擬制往副民部孰知汝宜同上俾參

版曹之繁初察制君牙之貳牋表類地卿之貳爰委典司理財

先示於簡庶利物每懲其聚歛唐太詔令李絳周有地官小司

徒佐敷五教魏置度支尚書以濟軍國之用政有余地然後庶

之常集授戶部侍專判度支制善其職者為登大任中茲選者

莫匪正人白集

四公

秩正貳卿

韋表微為中書舍人俄拜戶部侍郎職如故時自長慶實曆國家比多變故凡在翰林例無滿歲由是表微自監察六七年間秩正貳卿備承恩渥盛于一時

進為宰相

唐戶部侍郎有二員判使按者別一署謂之左戶元和後選舉華重宰相多由此進崔羣既相孟簡代之六典

四十位郎

晉潘孟陽為戶部侍郎年未四十其母謂曰以爾之才而位承郎使吾憂之

三歷侍郎

傳文類聚新集 卷之二十二 九 德壽堂

李元紘歷工兵吏三侍郎上令宰臣及公卿以下精擇堪為戶部者多有薦元紘者乃拜戶部侍郎元紘因條奏人間利害及時議得失以奏之上大悅因賜衣一副本傳

議戶版利病

楊瑒為戶侍郎帝召大臣議戶版瑒言利病甚詳帝咨賞

敘歷代戶口

唐太宗問盧承慶歷代戶口多少之數承慶敘夏已後迄周隋皆有依據

獨無進獻

李絳為戶侍憲宗問曰戶部比有進獻至卿獨無何也絳曰將戶部錢進入內藏是用官物以求結私恩上嘉其直

不受納賂

唐牛僧孺拜戶部侍郎初韓弘入朝父子俱卒諸孤幼小穆宗命中使閱其宅簿以付家老而簿上具納賂之所唯於僧孺官側朱書曰某月日送牛侍郎物若干不受穆宗按簿甚悅居無何議命相帝首可僧孺之名

計析秋毫

張平叔國之材臣也計能析秋毫吏畏如夏日司會逾月綱條甚張况師旅未息調食方急倚成取濟非爾而誰白居易除張平叔戶侍制

詔視財賦

潘孟陽權知戶部侍郎詔馳驛江淮視財賦孟陽持氣豪倨所至招金錢多補吏譽望大喪並唐書

開河疏諫

宋元祐五年主議者執開河減水之策戶部侍郎蘇轍上疏諫曰臣為戶曹右曹云戶部休戚計在此河若復緘默誰當言者惟斷在聖心盡罷其議

例外執奏

宋柳約字元禮權戶部侍郎感激奮厲悉力盡言凡例外宣索皆執奏以進周益公集

財用非長

王彥威開成初為戶侍判度支彥威於儒該遠亦善吏事但經總財用出入米鹽非所長也

伏獵誤讀

蕭昊不知書嘗與嚴挺之稱伏臘為伏獵挺之曰省中豈容有伏獵侍郎乎乃出之本傳

自稱老奴

唐張平叔為戶侍狡險大言因王播以進既掌財用常屈公利以便私嬖倖多狎之既有寵於上進退便僻雜以優諧或自稱老奴無復大臣之體

玩狎郎吏

嘗奏事畢降階復升上每笑容之在班列玩狎郎吏譁肆無忌推鹽法請宰相為之使因自求樞機之任同上

古今文集

雜著

太常少卿趙瞻可戶部侍郎誥

蘇軾

理財正辭禁民為非曰義先王之論理財也必繼之以正辭名正而言順則財可得而理民可得而正自頃功利之臣言政而不及化言利而不及義中外紛然朕益厭之具官趙瞻明於吏事輔以經術忠義之節白首不衰爰自秩宗擢貳邦計將使四方之人知予以耆老舊德居此官者蓋有盍徹之意焉

謝除戶部侍郎表

蘇子由

掖垣清闕奉鈇槩以媿安民部劇煩以金穀而為職事非素學命不獲辭伏念臣起於南裔曾未再暮擢在近班訖無少補開口論事適宸心延納之初引筆代言非書命縱橫之際竊祿而已功何足云計日以言時亦未幾方自其於汰去豈復意於超

升此蓋伏遇太皇太后陛下仁聖無為靜深照物坐閱工師之眾灼知情偽之端察臣朴愚憐臣孤遠才雖未能以應務性則不喜於為邪試之劇曹冀其來效然臣觀當今右部之政正值昔日新法之餘召募憂於歲荒差繇患于戶少事既難辯法當通方尚賴聖筭之明稍寬民力之僂臣之疎拙徒自勉強苟少緩於瘡痍亦圖報之萬一

再謝除戶部侍郎表

蘇子由

田野之姿入朝未幾侍從之貴冒寵已多方懷汰去之憂敢有趨遷之望中謝伏以右曹之政本專賦役之煩近歲以來復益金倉之舊下關民力上計邦儲朝廷議論積年於茲吏民封章繼日以上置局未遑於成法付部要責其奏功將以適四方之

宜爲一代之典自非精練吏事通知民情何以上副憂勤下寬
疲瘵如臣淺陋殆難克堪此蓋伏遇皇帝陛下聖貴乘時孝先
述志明於因革之故達於利病之源上覽祖宗之成規下采今
昔之公議昭然獨斷惠此小民謂臣出自賤寒或知劭農之意
性本愚拙庶無希合之情度越衆賢付以要務臣敢不上體聖
慮勉盡鄙心

與戶部鍾侍郎書

朱元晦

熹謹東向再拜致書侍郎執事熹昨得見於省戶下忽忽五年
中間來使閩部熹方退伏田里有俯仰出入之故雖不得瞻望
履舄之餘光亦嘗以章少卿文所致書輒爲數字之記以通於
左右是後乃不敢有所關白不自知其果能達視聽否也比來

同安踰伏簿書塵土中乃聞執事復爲天子出使巴蜀萬里之
外弛去逋負緡錢之在官者以數百巨萬計弭節來還天子嘉
之下所議奏於四方擢執事尚書省郎以計辯曹二十四司
之治可謂寵且榮矣又以執事通於君民兩足之義俾執事攝
貳於版曹務以均財節用便安元元爲職除目旣聞四方幽顯
無不悅喜以爲執事必能以所嘗施於蜀者惠綏此民寬其財
力之所不足以助天子仁厚清靜之政也今執事之蒞事數月
矣四方之聽未有所聞也熹不佞竊有所懷敢以請於下執蓋
喜聞之天子憫憐斯民之貧困未得其職故數下寬大詔書弛
民市征口筭與逃賦役者之布又詔稅民毋會其畸贏以就成
數又詔遣執事使蜀弛其逋負如前所陳者熹愚切以爲此皆

民所當輸官所當得制之有藝而取之有名者而猶一切蠲除不復顧計又出御府金錢以償有司是天子愛民之深而不以利爲利也明矣而况於民所不當輸官所不當得制之無藝而取之無名若所虧少經總制錢者乎熹以謂有能開口一言於上以天子愛民如此所宜朝奏而暮行也而公卿以下共事媿阿莫肯自竭盡以助聰明廣恩惠前日之爲戶部者又爲之變符檄急郵傳切責提刑提刑下之州州取辦於縣轉以相承急於星火奉行之官如通判事者利於賞典意外督趣無所不至此錢旣非經賦常入爲民所逋貫官吏所侵盜而以一歲偶多之數制爲定額責使償之自戶部四折而至於縣如轉圜於干仞之坂至其址而其勢窮矣縣將何取之不過巧爲科目以取之於民耳而議者必且以爲朝廷督責官吏補發非有與於民也此又與盜鍾掩耳之見無異蓋其心非有所蔽而不知特籍此爲說註誤朝聽耳計今天下州縣以此爲號而率取其民者無慮什之七八幸其猶有未至於此者則州日月使人持符來遠吏繫治撻擊以必得爲效縣吏不勝其苦日夜相與撼其長官以科率事不幸行之則官得其一吏得其二三並緣爲姦何所不有是則議者所謂督責官吏者乃所以深爲之地而重困天子所甚愛之民也夫吏依公以侵民又陽自解曰此朝廷所欲得非我曹過也夫愚民安知其所以然者何哉亦相聚而怨曰朝廷不卹我等耳嗚呼此豈民之所當輸官之所當得者蓋其制之無藝取之無名甚矣夫以天子之愛民如此彼所當輸

當得有藝而有名者猶一切出捐而無所吝况如此者惟其未
之知耳一有言焉其無不聽且從矣而獨愛其言者何哉是執
政任事之臣負天子也執事誠能深察而亟言之使所謂虧欠
經總制錢者一日而罷去則州縣之吏無以籍其口而科率之
議寢矣然後堅明約束痛加繩治敢以科率病民者使民得自
言尚書省御史臺則昔之嘗為是者其罪亦無容矣於以上廣
仁厚清靜之風下副四方幽隱之望無使西南徼外巴賁邛笮
之民夷獨受賜也豈不休哉喜踈遠之跡於執事有先君子之
好而亦嘗得一再見辱教誨焉今也適在此位為可言者誠不
自知其愚且賤思有補盛德之萬分故敢獻書以聞

律詩

送李戶部侍郎自河南尹再除本官 劉禹錫

昔年內署振雄辭今日東都結去思宮女猶傳洞簫賦國人先
錄衮衣詩華昌却復立昌位別鶴重歸太一池想到金門侍稱
藉一時驚喜見風儀

戶部郎中

歷代沿革 周官司徒屬官有下大夫蓋郎中之任也漢尚書郎
一人主力口墾田吳張溫為戶曹郎魏有左民部曹有農部
郎中又為左人右人後又為人部人曹皆戶部也晉兼置右
民郎曹東晉及宋齊唯有民部曹梁陳為左戶曹郎後魏為
左戶曹郎北齊有左民郎曹隋初民部郎曹置侍郎二人煬
帝除侍字改民部郎唐為郎中高宗改為戶部龍朔為司元

大夫後復故郎中負外郎各二人掌戶口土田賦役貢獻蠲免優復媼婚繼嗣之事以男女之黃小中丁老為帳藉以永業口分園宅均其土田以租庸調歛其物以九等定天下之戶以為尚書侍郎之貳其後以諸行郎官判錢穀而戶部度支郎官失其職宋元豐改官制罷三司歸戶部左右曹而三司之名始泯矣舊三司使即尚書副使即侍郎權發遣副使即權侍郎三司判官推官及判子司官即郎中負外郎之任元仍唐宋舊置戶部郎中二人

羣書要語地官為郎杜牧行幸退之制郎官皆為清秩杜牧行

韓賓制復以人曹郎佐掌邦計元微之行高允恭制叅我地官

之屬首於時俊之科類要

詩負外由來美郎中望不優寧知粉署裏翻作土山頭唐趙

謙光自大理正遷戶部郎中而負外郎賀涉戲詠云

人事實

家號郎官

唐韋維為郎嘗蒔柳于庭及憲兄弟居郎省對之輒歛容自叔謙後至郎中者數人世號郎官家

世上儒學

宋淳化中戶部郎中張郁父正仕至戶部郎中世尚儒學號書

樓張家長編

戶部二妙

韋維字文紀為戶部郎中善裁剖時負外郎宋之問善詩故稱

戶部二妙 詩話

正元十子

唐盧倫為戶部郎中有詩名於正元中與李端司空曙曙徒名為十才子形於圖畫以美其名 同上

儒術風采

唐武儒術遷戶部郎論事有風采 本傳

王質方雅

唐王質為戶部郎中以方雅特立除諫議大夫 劉禹錫為神道碑

斷叔姪爭嫡

隋高構轉民部郎中時有叔姪爭嫡尚書省不能斷朝臣之議不決構斷而合理上以為能勞之曰我聞尚書郎中上應列宿

觀卿才識方之古人之言信矣嫡庶者禮教之所重我讀卿判數遍詞理愜當意所不能及也賜米百石由是知名 隋書

論宰相領度支

唐武儒術遷戶部郎時皇甫鎛以宰相領度支剥下益上儒術上疏論列氣象高雅論事有風采 唐書

古今文集

雜著

戶部郎官廳壁記

施溫舒

國家分置六部各統其屬屬之所治各有攸司戶部之屬五其所治之事若民訟若賦役若供餽給賜若貨財出納若倉廩委積雖各掌其一而書判之冗會計之勞符檄之多憂責畧等也

中興以來五十年間凡同舍郎更代之姓名遷授之歲月漫不可攷淳熙五年今樞密同知謝公為左曹得二石為題名未就而遷御史既登西府諉同舍曰事求全則難成從簡則易就繇紹興至隆興遠矣典籍雖存非一朝所能討訂也姑舉闕典豈若首隆興之元而序次之其所未備則後之博雅君子攷諸國史而詳焉必有任其責者同舍皆曰然於是乎刻之淳熙八年十二月記

戶部員外郎

歷代沿革 **周** 官司徒屬官有上士蓋今員外之任 **後周** 依焉 **隋** 開皇置民部員外郎煬帝改民曹承務郎 **唐** 改民部員外郎正觀明慶咸亨龍朔光宅神龍竝隨曹改復員外郎二人從

六品上掌領天下州縣戶口之事凡天下十道任土所出而為貢賦之差分十道以總之 **宋** 尚書諸司郎中正七品 **元** 仍

唐宋舊置戶部員外郎二人

羣書要語 戶部員外郎掌戶口賦役貢獻蠲免優復姍婚繼嗣

之事 唐百官志 為尚書侍郎之貳 同上

詩句 錦帳隨時設金爐任意薰唯慙員外置不應列星文 趙謙

光酬賀詩

古今事實

涖事有聲

唐狄仁傑薦于光明為員外郎涖事有聲 唐書

奏議第一

唐裴向累為櫟陽渭南令奏議皆第一擢戶部員外郎

同上

賞其清俊

唐戶部與吏部鄰司時吏部移牒令戶部列棘以備交通呂太
一為戶部員外郎答曰眷彼吏部銓總之司當須簡要清通何
必設籬樹棘時賞其清俊

異其進獻

唐張濬累轉度支員外郎黃巢將通關軸濬托疾請告侍其母
挈族避亂商州賊犯京師僖宗出幸逾年供須衛軍不得食漢
陰令李康獻糗餌數百騾軍士始得食僖宗召康問曰卿為縣
令安操心至此康對曰臣為塵吏敢有此進獻張濬員外指臣
也帝異之急召至行在拜兵部郎中

古今文集

律詩

送白敏中新授戶部員外郎西歸

白居易

千里歸程三伏天官新身健馬翩翩行衝赤日加餐飯上到青
雲穩着鞭

戶部分掌

金科

○舊金部

歷代沿革周職金掌凡金玉錫石丹青之戒令漢置尚書郎四
人其一主財帛委輸蓋金部之任也魏晉宋齊後魏北齊並
有金部郎梁陳隋為侍郎唐龍朔中為司珍大夫咸亨復天
寶改司金郎中至德復舊建中初罷劉晏鹽鐵等使天下錢

穀委金部倉部中書門下揀兩司郎官准格式調掌尋復置使^宋金部判司事一人以無職事朝官充凡庫藏出納之節金寶財貨之用皆歸於三司而權衡度量之制主於太府寺本司無所掌元豐官制行郎中負外部始實行本司事初除晁端彥參掌給納天下之泉幣計其歲所輸數歸於應受之府藏以待邦國之用而鈎考平准市舶權易商稅香茶鹽礬之數以周知其登耗凡造升斗尺秤皆以法頒其禁令若事應諮決擬書者視度支分案七

法知雜案

元戶部令史分掌名頭有金科

羣書要語大寶曰位夏陳納貢之書聚人曰財漢有藏錢之府莫不取之以道用之以時不役人以奉身不遣人以供國自鹿

臺重賦東夏為墟鴻都賣官西園成市

張鷟集

財用金谷有出

納之政權衡度量有制作之法司珍之任實典治焉

南豐晁端

彦制

郎吏文昌之高選司珍民部之劇曹

曲阜陳弘制

司金劇

部命汝典之

孫升制

職金之任

初察張輔之制

古今事實

主財帛輸委

漢置尚書郎四人其一主財帛委輸蓋金部郎曹之任也

職林

掌庫藏出納

唐金部郎中掌庫藏出納之節金寶財貨之用權衡度量之制皆總其文籍而頒其節制

六典

盧自無愧

隋盧昌衡為僕射祖孝徵所薦遷金部郎孝徵曰吾用盧子均為尚書郎自謂無愧幽明矣隋書

蕭有父風

蕭穎士字茂挺終於揚州功曹子存字伯誠為金部員外郎諒直有功曹之風並唐書

對及治道

宋王師愈召除金部郎官數召對言事上孝宗時賜書曰比聞奏對頗及治道之具而未詳也尚有可裨政體而宜於今者亟復條奏其眷待之渥一時在廷之臣莫得望焉

不督虛籍

王師愈為金部郎戶部尚書言揚倓取諸郡積逋緡錢七百萬付

金部使督之公曰此錢徒有名耳督之未必有得而文移一下所擾不知幾何人且中外一體若邦計未裕不若歸誠君父以幸寬免豈宜舉此虛籍以罔上而病民耶持其事不下

戶部分掌

倉科

○舊倉部

歷代沿革周地官有廩人下大夫為倉人司祿之長掌九穀之數賙賜蠲食以知足否蓋倉部之任也魏晉宋齊後魏北齊並有倉部郎中梁陳為侍郎並以度支領倉部後周地官府有司倉下大夫一人隋置倉部侍郎開皇三年改度支為民部領之唐因隋曰倉部郎龍朔二年改司廩大夫天寶中為司儲宋倉部判司事一人以無職事朝官充凡倉廩受納租

稅出給祿廩之事皆歸三司而別置提點倉場官以督察本

司初除韓正彥建炎三年詔罷司農寺本寺諸倉場事務隸

倉部紹興三年復舊元戶部令史分掌名頭有倉科

羣書要語廩人掌九穀之數以待國之匪頒賜稍食以歲之

上下數邦國以知足否以詔穀用以治年之凶豐 倉人掌粟

入之藏辯九穀之物以待邦用 周禮 出納必恡有司之常貳上

下之價則茫昧者受敝雜苦良之貨則豪右者受贏惟一惟公

乃罔不同惟平惟實乃罔不吉 元微之行范季睦制 歲漕東青

粟六百萬石以實中鄙茲用命汝以廩人之職惟當於會計則

無曠爾官 曲阜除王宗望制 倉庾賦入之政祿廩賙助之法臺

郎典領列於右曹 南豐除韓正彥制

古今事實

居部無言

唐畢緘為倉部郎中故事要家勢人鄙倉駕二部居之者不悅

緘授之恬然如處美官無異言宰相知之遷職方郎中兼侍御

史知雜

為屬不附

孟簡為倉部員外郎王叔文為戶部侍郎簡為其屬中立正色

凝然不附 並唐書

掌出納事

唐倉部郎中掌天儲庫出納租稅祿糧倉廩之事 六典

掌給受事

宋倉部參掌國之倉場儲積及其給受之事列案有六倉場上供給納糶米掌法知雜神宗正史職官制

古今文集

律詩

送倉部蕭員外

韋應物

樸被蹉跎老江國情人邂逅此相逢不隨鴛鴦朝天去遙想蓬萊臺閣重

司部分掌

內度科

外度科

○舊度支

歷代沿革

漢有度支侍郎魏晉宋齊後魏北齊並有度支郎中

梁陳為侍郎開皇三年改度支尚書為民部尚書始民部

領之唐因馬龍朔二年改為司度大夫咸亨元年復故掌支

度國用租賦多少之數物產豐約之宜每歲計其所出而支

其所用宋度支判司事一人列六案

度支案發運案支供案

賞賜案掌法案知雜案

以無職事朝官充凡朝度之政皆歸

三司本司無所掌元豐官制行郎中員外郎始實行本司事

初除陳向參掌計度天下之經費以貢賦租稅之入而為之

出小事則擬畫大事則諮其長元戶部令史分掌名頭有內

外度科

羣書要語

鳴鶴登朝含雞伏省轉筋之敏未見稱奇聚米之能

無間播美張蒼之善等國用詎肯留情馮勤之攷計軍儲曾何

介意年支國賦為政之嘉猷歲計軍儲邦家之要務位參計

會職縮度支 唐張鷟集 支度要部 胡文恭行盧成制 財物多寡

之數物生豐約之宜司度之曹典貳為重 南豐除陳向制 度支

掌支度國用租賦多少之數物產豐約之宜水陸道路之利每

歲計其所出而支其所用 六典

古今事實

自職度支

狄梁公以度支之司天下利害部常闕人求之未得乃自職之

唐職林

始有副知

蘇弁授度支郎中副知度支事仍命立於正郎之首有副知之

名自蘇弁始也 六典

奏數千言

崔仁師為度支郎中嘗奏度支財物奏數千言手不執本太宗

令杜正倫齋本與仁師對唱一無差殊太宗大奇之 唐書

判出入案

唐故事度支案郎中判入負外郎判出侍郎總統押案而已

奏理奪田

張仲方少朗秀父友高郢見而奇之曰此子非常必為國器後

為金州刺史郡人有田產為中人所奪仲方三疏奏聞竟理其

冤入為度支郎中

勅求杜若

正觀中勅下度支求杜若省郎以謝朓詩云芳洲采杜若乃責

坊州貢之當時以為笑

筆談

元理善笑

曹元理善笑回筭知二國之粟不差升斗也

西京雜記

蕪領三曹

宋徐宗說在度支會右曹金部皆闕官因令蕪領三曹金谷織悉之地而宗說素有心計於天下經費出入盈縮之數莫不通知老吏為之歛手

中興係年針

古今文集

雜著

論度支疏

權德輿

十一月十二日將仕郎守右補闕臣權德輿謹昧死頓首上疏

皇帝陛下臣聞建官惟賢任人以器細大畢效輳輻無遺蓋就其所長以求至當古人所以有優於趙魏而劣於滕薛敗於粟邑而理於潁陽誠才各有所極也伏見司農少卿權判度支裴延齡早以文學累居官次固而似守刻而少通徒有專勤之心且非適時之器往者貳大農之卿長司太倉之出納號為稱職蓋有恒規陛下急於獎能切於賞善權委邦賦冀有成績且度支所務至重量入為出從古所難使物無遺利而不可竭竭則害生類使奸無隱情而不可刻刻則傷人和調其盈虛制其損益上繫邦本下係元元苟非全才通識則有所壅自延齡受任已近半載群議紛然皆曰非宜且權其輕重固與守之之才不固邊儲經費之功懋遷移用之法貴無留事以酌乎中簿領簡

書周行郡國失於毫釐利病相萬一物未理所軫皇情而延齡切於感恩昧於量功思有以效強所不通則有枉尺直尋之心多方自固之計吏伺其隙人售其奸因緣蒙蔽觸類滋長致遠恐泥學製實傷異時甚敗罪之何補伏料聖意久未正授延齡職名似觀其能否以為進退官司間里眾口一心評議誼諱所不可遏伏望與一二宰臣時有裁議或詔問度支郎官使得以事實條對苟言者緣妄盍有以辨之或才實未稱恐難久處儻擇能代命以他官以全延齡以便天下上副求理之意下遂陳力之宜則事任交脩職業不廢臣忝備陛下諫諍之官常服師訓緘默自負無以為容阮嗣宗口不言人之短臣心常師之但以束帶立朝則異於是職當獻納豈敢顧身耳有所聞心有所

見義在無隱以奉聖明言而獲戾臣之歎所不勝愚瞽悃款之至伏惟陛下裁擇

戶部分堂

糧草科

轉運天下糧草急關規畫等事

○舊屬糧料院

歷代沿革宋仍舊制以三司大將軍為都糧料使自開寶六年以著作佐郎陸光範充改用京官自此始太平興國五年分諸司馬軍步軍為三院八年以馬軍步軍合為一院雍熙四年命供奉官陳處晦勾當諸司糧料供奉官曾祚勾當馬步軍糧料自後復分馬步軍為兩院或以諸司使副分主之端拱二年復以京朝官主之元豐末併馬步軍與諸司為二院隸太府來掌以法式頒廩祿凡文武百官諸司諸軍奉料以

勝準給中興以來行在諸軍諸司糧料院鎮江建康有分
差諸軍糧料院鄂州有分差戶部糧料院四川總所有分差
戶部魚關糧料院分差利州戶部糧料院六院官例以京官
知縣有政績者爲之故恩疏數畧視職事官而不入雜壓紹
興間胡汝明以料院除監察御史遂遷副端乾道復相繼入
臺者有宋敦書等數人而六院彌重號爲察官儲美紹興間
復入雜壓淳熙間削去近歲復舉班在五寺簿下太學博士
上元戶部令史分掌名頭有糧草科

羣書要語宮正均其稍食又云月終則會其稍食周禮

古今事實

躬自檢校

宋汪大猷字仲嘉幹辦行在糧料院文書盈几日不給視公間
摘一二無不切中老艾驚嘆謂未有也或言摧貨務左藏庫有
羨儲朝旨以委公躬自檢校得其實以對樓攻魏集

除太常簿

宋林正惠公大中字和叔幹辦詣司糧料院求外補同擬者四
人孝宗指公與計衡姓名曰此二人佳可除職事官遂除太常
寺簿同上

審計

審計天下見在錢帛可支年月

○舊屬審計院

戶部分掌

歷代沿革宋以三司使總邦計司各有院以秉中外泉穀出入
之政蓋會計之府也然案牘叢委典者不能徧察而奸容焉

淳化三年始用戶部使樊知古奏別其冗籍復別為院置官領之以聽稍食之要貳置院之初特掌騎兵徒兵給受之數猶未及諸司也元豐三年合步騎兩院為一遂以其一主諸司上自宮禁朝廷下至斗食佐史凡賦祿者以式法審其名數而稽其辟召者唯效賜給已乃審祿有疑予則詔以法凡四方之計籍上於大農則逆其會凡有司議調度會賦出則諏焉設員二曰左右聽分案令史八人舊為諸軍諸司專勾司建炎元年改諸軍諸司審計官元戶部令史分掌名頭有審計科

古今事實

以為關鍵

宋紹興五年臣寮言臣切惟國家之賦祿以糧審為關鍵糧審之勘給以法令為承式

中興會要

不交權要

宋辛次膺監諸司審計司未嘗登權要門參知政事孟庾被詔薦其才遂召對是日除駕部員外郎

胡澹庵集

古今文集

雜著

審計院廳壁記

吳博古

審計非古官也而原於古古者凡官府皆有要會而財用稍食之會尤詳國初以三司使總邦計司各有院以秉中外泉穀出入之政蓋會計之府也然案牘叢委典者不能徧察而姦容焉

淳化三年始用戶部使樊知古奏別其冗籍復別爲院置官顯
領之以聽稍食之要貳置院之初特掌騎兵徒兵給受之數猶
未及諸司也元豐三年合步騎兩院爲一遂以其一主諸司上
自宮禁朝廷下至斗食佐史凡賦祿者以式法審其名數而稽
其辟名者唯效賜給已乃審祿有疑予則詔以法凡四方之計
籍上于大農則逆其會凡有司議調度會賦出則諏焉設員二
曰左右聽分案令史八人然夷考縣官祿賜之費月長歲滋如
江河下流愈遠愈闊其浸淫未易隄障也自至道末歲給中都
官吏不過十數萬紙熙寧月四萬今又倍之百司吏祿又靡耗
特甚蓋居兵費四之一豈據勝涉筆者曾無抹於經費一端本
澄源不在有司歟然糧審爲大農關鍵倘據會要而覲則倖穿

必有蹊蠹藏必有冗損益本末蓋可覩已院故無記前人名氏
不傳三山林君湜建安周君擘斷自南渡緒次官簿錄之石亦
不苟於其職矣故爲書職掌大畧於其端以諗來者院舊曰專
勾中興避御嫌名更今名云淳熙十四年九月旣望記

審計院題名記

吳傳古

秋九月諸司審計司作題名屬余爲之記江陰呂君棐廬陵孫
君逢吉造余曰兩院皆君昔所泄寧獨遺其一也敢繼以請余
觀舊事自淳化綿絕之始以三班掌事後稍更用京朝官中興
選任尤寵善職者徑登郎省將使指近比非試邑有聞者不在
選中臺有缺屬於焉是擇士脫州縣登朝於焉問津其輕重視
昔何如而官是者昧焉不見姓名於後寧非缺歟諸君蒐補闕

遺而余陳朽亦牽聯得書寧非幸歟顧併征余文將爲兩院重
茲幸也寧非辱歟余曩嘗閱軍簿會兵費竊喟然嘆曰本邦維
財蠹財維兵觀本與蠹相盛衰蓋卽是馬觀之試挈一歲審放
之最錢以緡計糧以斛計帛以足計續以兩計者百二十有四
億僅足以贍中都之六列戍三番者不預焉秦漢以來雖或連
兵曠歲費不擬此今羣弓柔遠期與天下休養而無涯之費如
故民力安得不屈耶惟九重儉慈不以一毫妨經費曰民與兵
是恤是圖是以民無怨咨曰縣官所以征取於我者凡以衛我
也兵無缺望曰縣官所以衣食於我者極此固不薄於我也然
欲使兵絕虛籍國不徒費士得全廩師以不饑則任職者可不
閔民力之不易念官賦之難支悉意審覈以佐公家之萬一乎

沁革本末大畧與諸司同不復書姑以所嘗更者書以爲後遺
淳熙十四年十月四日記

新編古今事文類聚新集卷之十二

終

宣統十四年十月四日
公華本末大畧與諸臣同不窮責故以故嘗使來書以燕於





